

近代中國史料叢刊第二十九輯

沈雲龍主編


還讀我書室老人手訂年譜

董

恂著

文海出版社印行

還讀我書  
室者人年  
譜目



W. H. R.

光緒十八年閏六月十八日

內閣奉

上諭原任戶部尚書董恂老成練

達由部屬外任監司疊荷

先朝恩眷擢授府尹洊陟正卿宣力

有年克勤厥職嗣降旨令其開  
缺茲聞溘逝軫惻殊深著加恩  
照尚書例賜卹所有原任內一  
切處分悉予開復應得卹典該  
衙門察例具奏欽此

皇帝諭祭原任戶部尚書董恂之  
靈曰鞠躬盡瘁臣子之芳踪  
賜卹報勤國家之盛典爾董  
恂性行純良才能稱職方冀  
遐齡忽聞長逝朕用悼焉特

頒祭葬以慰幽魂嗚呼寵錫  
黃墟庶沐匪躬之報名垂青  
史聿昭不朽之榮爾如有知  
尚克歆享

光緒丙戌還讀我書  
室老人八十小像





英念棠陰去後思廣陵古埭潮遺基謝  
公自繫蒼生望不是靈侯坐賭棊  
輶車南北考方輿三載窺園又著書  
君著有隨輶載華七種并轉漕江程各筆記戶部海運後棠陰成於君多志別前年崑里後所著也  
問玉杯蕃露外一官一集復誰如奉題

醞卿大兄先生甘棠小志寄請

政旬 戊午歲七月愚弟祁騫藻



右三十年前 祁文端師贈句也歲戊子謹摹勒識此時年八十有二

還讀我書室老人手訂年譜

老人系出江都董氏名恂字忱甫號醞卿先世於前明洪武間自蘇州府還遷揚州江都之邵伯鎮 國朝雍正十年壬子析江都地置甘泉縣鎮隸甘泉遂爲甘泉縣人民籍

嘉慶十二年丁卯八月初四日卯時生

時我 父光祿公

公諱萬元字善長 門下士山左郭仁山謹填諱

具慶家居

丁太夫人<sub>生</sub>余於鎮之運河西惠政橋東南舊第 先大

父錫五公

公諱維福

得長孫甚喜名之曰椿小字長春欲其壽

也因字壽卿自遷邵鎮至是垂五百年 五世祖孟綱公

公諱德明

高祖冠賈公

公諱洪茂

曾祖煥文公

公諱啟章

曾祖妣

熊太夫人 祖錫五公 祖妣薛太夫人

十三年戊辰二歲

十四年己巳三歲

十五年庚午四歲

先大父翦紙爲書逐字指授壁懸朱柏廬治家格言口授

畧能成誦

十六年辛未五歲

十二月十六日薨林弟桂生

十七年壬申六歲

十八年癸酉七歲

始出就學從龔民懷師

諱同轅太學生

受書於潘氏宗祠五月十

六日 大父錫五公捐館舍卜吉葬閔家橋舊塋

十九年甲戌八歲

十月十二日 光祿公捐館舍卜吉葬閔家橋舊塋連年

兩遭大故五內摧傷茫無所措日共我 母我 大母哀

號勸慰而已是年湖水秋漲運河東連舊第半圯於水

二十年乙亥九歲

舊屋破不可居我 大母我 母并余及一幼弟爰爰無

依遷運河東廟巷南倉巷北大街東 丁太夫人脫簪珥

力鍼齋命出就學從余黼溟師

諱兆鯤  
邑庠生受書

二十一年丙子十歲

遷紅橋西李家巷巷西口濱運河余居邵鎮凡三遷此其

再也惟居此最久凡二十有五年道光乙巳囑同官田吉

生祥繪篝燈課讀圖亦卽繪此

二十二年丁丑十一歲

太夫人命率薌林弟出就塾同受書

二十三年戊寅十二歲

二十四年己卯十三歲

二十五年庚辰十四歲

道光元年辛巳十五歲

經書粗讀畢

二年壬午十六歲

受業潘侶笙師

諱鏞郡廩生

始爲八股文試帖詩

三年癸未十七歲

四年甲申十八歲

僦屬於外設塾訓蒙

五年乙酉十九歲

應童子試

試題春秋好辯章  
賦得鳥鳴桑樾熟

堂備未售批云語不枯滑神

亦酷肖次詩俱通順

六年丙戌二十歲

元配談夫人來歸自此家遂有五口

七年丁亥二十一歲

八月二十九日子蓉生九月初五日

大母薛太夫人棄

養以承重丁憂停試

八年戊子二十二歲

移訓蒙塾於家

九年己丑二十三歲

十年庚寅二十四歲

服闋應試受知郡侯黃松溪先生

諱在厚

邑侯鍾挹雲先生

諱承露

府縣前列是年五月初九日女蘭生

十一年辛卯二十五歲

院試取入縣學第六名

試題夫子不答南宮适出如追放  
承既入其莛又從而招之賦得時



有養日得時字學使為白小山師諱銘時官吏部右侍郎同案十八人撥府

者六

十二年壬辰二十六歲

正月十三日薌林弟以勤業積勞成疾棄世舊塋無地權

附塋側雁影中分酸楚何極事實畧具先後祭文中是年

歲試一等第六名並取詩古學使為廖鈺夫師諱鴻荃謚文恪時官

內閣學士兼禮部侍郎銜詩古覆試日具丁太夫人節孝事實面呈

請匾旋給匾式並牌示荻筆書芬四字是年館王春江司

馬宅藏書甚富藉資流覽梅花書院甄別錄取正課肄業

時兩淮運使爲俞陶泉師諱德淵自是至庚子觀政以前甄

別月課歷取正課超等十二月十六日女芸生

十三年癸巳二十七歲

學使科試一等第四名並取詩古俞陶泉師數於院課時  
言余姓名與前鹽政同諭改名至再是年科試後因更名

醇

十四年甲午二十八歲

補增廣生

十五年乙未二十九歲

歲試一等第八名並取詩古學使爲龔季思師

諱守正諡文恭時官

戶部左

侍郎

十六年丙申三十歲

二月初五日女蕙生

十七年丁酉三十一歲

遷東街以上三遷皆典產是年科試一等第四名並取詩

古鄉試中式第二十二名

同榜百十七人頭場題博學而篤志二句禮儀三百二句昔者

有饋生魚至子產曰得其所哉得其所哉賦得人在鏡心得人字

主考爲清苑王曉林師

諱植時官刑部右侍郎

蒙古柏聽濤師

諱夜時官內閣學士兼禮部侍郎銜

同考松陽

楊研究生師

諱孫芝時以大挑知縣候補

榜後初謁梅花書院山長徐松

泉師

諱培深前廣西道監察御史

十八年戊戌三十二歲

計偕北上報罷歸里

十九年己亥三十三歲

設塾於家仍藉脩脯供菽水七月二十三日女茗生

二十年庚子三十四歲

會試中式第六十七名

同榜百八十三人頭場題如琢如磨者自脩也蓋均無貧和無寡用

下敬上謂之貴費用上敬下謂之尊賢賦得慎脩思永得謨字

總裁潘芝軒師

諱世恩加太傅諡文

恭時以武英殿隆雲章師諱文謐端毅時龔季思師官時

大學士管理戶部官戶部尚書

禮部諱瑋慶時官同考陳鐵橋師諱憲曾時官翰林院侍講

尚書王蕩塘師戶部右侍郎

學士

士

保和殿覆試一等第十六名覆試題子曰不憤不啟一章賦得金人示戒得言字

殿試二甲第十八名是科二甲八十七名三甲九十名

朝考入選第三十四名是科入選共五十八名題為子罕言利論察吏安民疏賦得霖雨思賢佐得心

字時未有一二三等之制但有入選不入選之分

賜進士出身

欽點主事分部學習簽分戶部雲南司尋兼浙江司行走是年順

天鄉試 恩科充內簾收掌官差竣乞假迎養

二十一年辛丑三十五歲

奉 丁太夫人由水路入都盡室行子蓉聘媳同邑庠生

趙紫卿諱驊女貞齡隨行寓繩匠衚衕路東

二十二年壬寅三十六歲

分部分司以來讀漕運全書本部則例以朱紫藍墨筆分

別標記并讀張文端書楊勤懋書公餘輒臨漢碑自手錄

公牘外不復臨楷帖是年堂派幫辦雲南司主稿

二十三年癸卯三十七歲

六月二十七日談夫人去世夫人勤儉孝慈得重慈歡以  
憶岳母齊太孺人不得見成療事實畧具手製祭文彙中  
閏七月二十七日子蓉以毀亡聘媳趙氏立志守貞幾以  
身殉 太夫人傷悼致疾以內助無人命置側室十二月  
堂派現審處差是年移寓潘家河沿路西葉姬來

二十四年甲辰三十八歲

正月二十九日以學習期滿引

見養心殿奉

諭准其留部六月派充漕運全書館總纂是書開辦數年未竣至

是揮汗如雨連宵達旦以速補遲十二月告成進呈黃冊  
奉

旨依議發刊

二十五年乙巳三十九歲

三月初二日子蓮生

奉鄉林弟後

丁太夫人前經禮部題准

旌表節孝是年繪篝燈課讀圖成不數年間詩文贊頌褒然成集  
後修揚州府志甘泉縣志均由書局採訪開載十月十五  
日恭遇

覃恩時

臣

醇以雲南司主事加一級



誥贈臣

祖父奉直大夫如醇官

祖母爲宜人

誥贈臣

父奉直大夫如醇官

誥封臣

母爲太宜人是年七月堂派現審處主稟十一月堂派

捐納房差

二十六年丙午四十歲

三月堂派雲南司正主稟五月堂派捐納房正主稟閏五

月潘芝軒師派隨帶稽查京通十七倉六月隨祁春圃師

諱寓藻贈太保諡文  
端時官戶部尙書

文孔脩師

諱慶贈太保諡文  
端時官兵部尙書

馳驛天

津查辦長蘆事件作問津記一

是爲隨軺載  
筆七種之一

同事爲敬廉

階文陸小雅以十二月隨柏靜濤師時官戶部陳子鶴倉右侍郎

帥諱孚恩督收天津南來商米作問津記二時以南漕河運

費冗將行海運以此為嚆矢試海道同事為聯秀峯英

二十七年丁未四十一歲

二月隨花松岑少農諱沙納陳子鶴倉帥督收海運商米作

問津記三計收買米三十萬石有奇同事仍聯秀峯是年

四月初十日子茗生

二十八年戊申四十二歲

三月隨朱桐軒師諱鳳標贈太子太保諡文端時官戶部侍郎德默庵倉帥諱誠

赴津驗收海運南糧作問津記四有步韻海運紀事詩四

律同事爲奎印甫

綬時爲坐糧廳監督

聯秀峯是役也較河運計省

冗費銀九十餘萬兩卽以此於是年儘數糴南米隨漕實

京倉差竣蒙

恩遇有主事缺出儘先補用七月二十八日補福建司缺仍主雲

南司稟八月堂派則例館總纂九月派偕齊文甫

斌達聯秀

峯英

熙挹雲

麟諡忠勤

陸小雅

以烜

趙笠農

霖

會同捐納房議變

通捐輸章程是年冬王大臣議折漕同司聯銜具稟爭之

不得復單銜具稟爭之作駁折漕議云

國家漕東南粟歲四百萬達

京師長江爲咽喉黃河爲胸膈在在可虞而行之不廢繫豈不知變計蓋其意甚深遠也各直省州縣常平穀數載在則例試廉其地不獨無粟甚且無倉

畿輔重地萬萬不宜有此檢京通倉十有七爲廩凡千二百有奇廩受萬石歲進糯稷粟麥豆斷不至無倉二十四旗百二十一甲喇千三百八十五佐領合材官技擊廝養羨卒十七萬人計口月給旗倉遞推如轉環雖有侵耗斷不至無粟是何也州縣僅積貯之虛名京通有出納之實

事也挨年而放有推陳出新之義無月不支有以放代盤之義若改折收折放別採買以實儲備勢不至如州縣之無粟無倉不止夫漕法之敝蠹於倉者花戶蠹於壩者經紀蠹於幫者尖丁蠹於州縣者奸胥豪棍諸弊膠結堅不可解以折色舉而空之謂非快事哉然萬一有警軍無見糧轉輸不及誰執其咎竊以爲不可或曰民糶於南以輸官官糶於北以給兵收折色放本色倉制不變儲備無虞可乎曰民糶於南其直賤官糶於北其直貴今將逆計採買之價之昂商運水陸舟車之費之鉅而概取諸民民不

堪也若取民所糶之直令稍稍增益之不敷採買官籌經費以補助之議省費轉滋費國不堪也重徵病民輕徵病國無一而可且額漕盡折徵耶商歲運四百萬勢必不能分成折徵耶南北漕衙門均不能裁未見其省也不如仍徵本色便稟留其折漕議覆各摺具手錄折漕議彙中有折漕議彙序十二月二十一日女芸于歸玉田檢討孫雲溪同年

諱晉  
堉

子光燮

二十九年己酉四十三歲

二月初吉懸溟司職守說於司堂上年祁春圃師言先大

夫嘗官雲南司主司稟有己庚編有滇司職守說因出以

見示至是乞襄鶴汀師書職守說一通與同人謀刊而懸

之以垂久遠四月杪右堂福原修諱濟派赴步軍統領署會

同查辦旗務積弊同事爲銓部崔葛民侗昇如亭福慶禮

庭約薛鶴亭鳴比部袁小泉彥文勵泉熙提督署聯桂岩

芳閏四月隨陳子鶴司寇福原修司農馳驛山西查辦事

件作迎薰記是爲隨軺載筆七種之五同事爲比部奎印甫程容伯恭

提督署烏芝齡雲是年四月初十日子蕢生比自晉差旋

已殤時都中議采買因輯采買議作采買議輯序其利病

詳具序中六月二十三日隨星使覆

命是日堂派會查浙省已征未解錢糧事件同事為軍機吳補之

光業袁午橋甲三諡端敏聶雨帆雲崇雲谷泰穆清軒蔭瑞慰農

春比部張叔涵春袁小泉彥鄭小珊敦桂雲生昌文星崖

煜崇楚帆祥本部熙挹雲麟保樂齋衡杜蘭溪學九月祁

春圃師時以戶部尙書協辦大學士派隨辦會同查訊涂侍御奏參倉

場事件同事為軍機邵位西懿崇雲谷泰銓部祥蘭圃裕

寶蘭泉坊儀部恩履堂成提督署聯桂岩芳本部王漢橋

映斗同時堂派覆覈籌賑事例章程同事為齊文甫斌熙挹



雲陸小雅十月朔隸書甘棠萬壽宮碑碑爲徐來峯

玉豐撰

初二日接春圃師函諭其畧云今日奉

旨出差蜀中敬煩同行比年鞅掌深抱不安賢者多勞想不見棄

也偕同事比部馮曉滄

枳

本部鍾石帆

秀

馳驛隨行於月

之十三日涿州行轅始發封知所往於是作度隴記

是爲隨軺

載筆七種之六

既抵蘭垣時琦靜莽節相

諱善奉義侯贈太子太保諡文勤

甫握

督篆派李季雲廉訪

恩慶時以甘涼道權臬篆

來會訊計二十二日獻

畢言旋除夕宿固原之瓦亭驛

三十年庚戌四十四歲

元日發瓦亭驛十七日道聞喜裴柏村隨謁晉公祠星使  
擬補書韓碑恂請跋碑陰詳度隴記先是星使隨摺乞假  
五日歸省尋於途次驚聞

宣宗成皇帝於正月十四日上賓旋卽星奔覆

命同於二月初六日抵京

文宗顯皇帝登極春圃師遵

旨保舉人員醇名與焉三月二十一日蒙

恩召對東書房并於五月十七日通奉量才器使毋庸照尋常升

轉

恩旨是年正月二十六日恭遇

覃恩時臣醇以福建司主事加二級

誥勲贈臣祖父奉政大夫如臣醇官 祖母宜人

誥贈臣父奉政大夫如臣醇官

誥封臣母太宜人三月初二日再遇

覃恩臣恭膺

誥授奉政大夫福建司主事加二級妻

誥贈宜人四月十三日三遇

覃恩時臣醇以福建司主事加三級

誥晉貽贈臣

祖父朝議大夫如臣醇官 祖母恭人

誥晉贈臣

父朝議大夫如臣醇官

誥晉封臣

母太恭人是年移寓南橫街路南十月望堂派漕運

全書館提調封篆後賽鶴汀師

諱尙阿時以戶部  
尙書協辦大學士派查歷

次豁免民欠

恩詔事宜有恭錄

恩詔序同事熙挹雲三蓮齋

壽

何伯英

國琛

咸豐元年辛亥四十五歲

保和殿考試試差

試題樂民之樂者民亦樂其樂必有忍其乃  
有濟有容德乃大賦得濂溪樂處得焉字

五月八日女蘭生次年殤七月堂派則例館提調八月充

順天鄉試同考官得續曾等十七人

浦安王維珍銘安傅慶貽先後成進士

副榜李忻等四人詳秋闈瑣記閏八月十一日出闈謝

恩翌日女蘭于歸同里談健堂國學

諱榮乾

子恩錫堂派議太捐章

程同事熙挹雲忠鶴臯

涪

崇雋峯

保

暹益亭

福

王魯園

琛

何伯英錢萍江

寶青

月杪右堂王雁汀

諱慶雲諡文勤

派隨查萬安

東西兩倉同事恩澈軒

保

九月題升廣東司員外郎十二

月初七日京察過堂時署左堂何根雲

諱桂清

右堂麟梅谷

諱魁諡文端

未到任在座管理戶部大學士祁春圃師正堂裕

芸臺

諱誠贈太保諡文端時以戶部尚書公協辦大學士

孫符卿師

諱瑞珍諡文定

左堂禧

仲蕃

諱恩諡文莊

右堂翁遂齋師

諱心存贈太保諡文端

二年壬子四十六歲

二月十八日以京察一等奉

旨加一級記名以道府用

召見東書房

天顏溫霽奏對移晷時星使孫符卿師慶雲舫倉帥

諱祺諡恭肅

以驗

收海運南糧亦於是日跪

安是月題升浙江司郎中三月隨星使赴津作問津記五

是為隨輶載筆

第七 有仍疊前韻海運紀事詩同事為裕粹庵鍾時為坐糧應監督

王月川亥端諡成魏卿琦振仁齋麟是役也較河運計省

冗費歸公銀六十萬兩分撥豐工決口廣西軍營事竣蒙

恩交軍機處記名遇有道員缺出請旨簡放先換頂帶戊申壬子兩次海運

統計節省歸公銀一百五十餘萬兩竊疑癸丑以後何以不聞此項節省銀兩歸公比讀文忠年譜於乙卯海運稟明不收薪水不受供應句下注稱是差南省厚餽名薪水本地方供應甚豐云云此則戊申壬子所未聞也於此乃悟癸丑以後前項節省銀兩所以不復歸公之故六月派議旗民交產章程同事

熙挹雲崇雋峯馬梅巖晉遲益亭福蔡雲士廣李益齋莊

上年出闡後以豐北決口久未堵合派議河防事宜爰輯

前人防河諸議手自繕寫至是繕訖作河防議輯序七月十六日女生八月十三日奉

上諭湖南糧儲道著董醇補授欽此翌日謝

恩東書房

召見蒙

恩垂詢一切謹據實奏對並陳明此次擬由水路察看運道乞假修墓各情九月十三日出都有轉漕衡湘筆記沿途目擊證以載籍作南旺馬踏蜀山三湖考畧運泐考畧泗水考畧自十月杪過趙村聞後東西兩隄或斷或續十一月初



二日過仲淺師莊諸閘石多殘毀運河口樹懸一旗題曰  
魯橋汎三官廟出湖處自此遂行獨山湖記道光辛丑經  
此運河岸西爲南陽昭陽微山諸湖岸東則獨山湖今豐  
北口決黃河入運並諸湖而一之巨浸稽天茫無涯涘初  
七日將進鮎魚涎口舟爲南昌糧艘所壓幾不免月杪過  
淮安自此南抵大江高寶及甘泉境諸湖凡在運河岸西  
者水皆由湖入運以助漕在運河岸東者水由運入湖以  
洩漲後來纂輯江北運程一書及楚漕江程一書皆本此  
筆記十二月初三日抵邵伯鎮擇吉拜埽西塋南塋松楸

如故瞬己一星終矣卜地趙家莊葬談夫人柩子蓉柩并  
遷薨林弟櫬歸葬新塋時以寇氛道梗歲杪奉板輿僦居  
郡城小玲瓏山館

三年癸丑四十七歲

正在束裝聞武昌失守復奉板輿遷城東大橋鎮時張石

卿制帥諱亮基奏催赴任得

嚴旨爰以乞養侍膝下意請於太夫人太夫人謂受

恩深重當此人心不靖正臣子效命之時汝若遲疑我先引決乃  
泣受命長江既不可走於二月初十日拜別隻身行定改

道溯黃計有赴楚溯黃記黃河形勢說三月初三日恭遇

覃恩時臣醇以湖南糧儲道隨帶加一級

誥晉贈臣祖父中議大夫如臣醇官 祖母淑人

誥晉贈臣父中議大夫如臣醇官

誥晉封臣母太淑人是月二十六日登陸由開封歷信陽於漢

口渡江達武昌謁張石卿制帥崇荷卿中丞綸並晤岳岱

青方伯興羅淡村廉訪遵殿諡溯江至臨湘改道陸行過

巴陵行館四月杪抵長沙謁駱籲門中丞諱秉璋贈太子太保諡文忠

晤周子儼方伯頤陶問雲廉訪恩培諡並曾滌笙宗伯諱

藩贈太傅諡文正  
時在省督辦團練

五月六日接道篆偕問雲同奉委與子

儼暨夏憩亭觀察

廷越

督辦善後總局事江西警信日至自

是在城藩臬道府分夜巡城城上守兵夜分兩班比巡閱

時上下班盡出乃告統兵官曰分班輪守上班者守則下

班者息所以惜兵力養兵銳以備有事之用也何須盡出

官意不然余謂我之遵令巡閱以勞之也若如此是適所

以擾之且我來而下班者起豈我去而上班者亦可臥耶

兵以防寇審如是是防我也事宜從實不可蹈虛再三慰

諭始欣然領諾六月杪徐君青方伯來

諱有王諡莊愍子儼回鹽道本任

七月望奉部議折漕詳閱其章程頓足曰噫自是湖南不復漕矣亟思挽救苦未得策八月十三日月課城南書院嶽麓書院手自批閱訖九月初二日亥刻家信來言丁

太夫人於八月十一日在籍棄養神魂飛越搏膺慟絕無

復可說稍甦刻遣報院請派接道篆遲明設位朝夕上食

臨於內寢初五日吳甄甫制帥

諱文鎔謚文節時新調兩湖

來奠連日

自中丞以下來奠具門簿中時武昌有警長沙議設防張

靜山觀察

興仁時接署糧儲道篆

來言方伯廉訪擬請奏留襄辦防

剿叩首泣謝不孝以苟祿來此不能親視哈斂罪已擢髮

難數家中祇有弱小脫遺觀或遇不虞此生何以爲人儻  
賊果臨城如昨日之閉門登陣斷不倉皇絕遁若事非緊  
急有戶可由不忍不星奔歸里安葬乞鑒哀忱叩首叩首  
十六日已刻城門始啟時交代甫清翌日冒雨登程度插  
嶺關入江西境沿袁江而東經南昌省城抵玉山陸路至  
常山縣入浙江境復舟行過杭州省城換舟過王涇江里  
許入江蘇境十二月朔晤常州太守世顯侯焜並晤同年  
蕭仲香觀察時馥時官常鎮通道言揚州城於前月二十七日收  
復由丹徒越河諫壁街出口渡江進三江口初四日旣夕

抵邵伯鎮劉家巷

夏間大橋有警子蓮等奉板輿遷此

詰朝赴趙家莊展墓

冬初邵鎮復有警子蓮等奉靈輜權厝新塋

迄今踰三十年敘述至此淚涔涔

不能止有不可爲子不可爲人之慟當時可知已歸復設

位朝夕上食臨於內寢如初

四年甲寅四十八歲

卜吉於正月二十七日由趙家莊奉太夫人靈輜歸舊

塋合葬先大夫光祿公之墓如禮憶幼時讀塾本戴記

乙去曾子問喪服小記喪大記奔喪問喪服問閒傳三年

問喪服四制等篇餘亦篇刪其節節刪其句未之讀也至

是補讀之自去歲除夕始凡有知覺痛楚輒識之書額並  
見奉諱歸里筆記

五年乙卯四十九歲

西鄉展墓加修以地近湖患水多植柳護之繪圖及南鄉  
新舊塋圖並纂甘棠小志十二月服闋岳母齊太孺人以  
葉姬能當大事呼之以女授冠帶命稱繼室是月初九日  
歸孫宅女芸故於玉田次年始得信十六日女蕙于歸同  
郡知諸城縣事何琴岩明府

諱子錫侃

六年丙辰五十歲



二月望以起復北上三月十一日抵京有

魏闕重瞻筆記四月十二日戶部奏留郎中上行走綜司派辦  
事件奉

旨依議漢員得此異數也時管理戶部大學士爲文孔脩師二十

日旋蒙

恩旨簡放直隸清河道二十二日謝

恩蒙

召見乾清宮五月望抵省謁節相桂燕山師

諡文端  
贈太傅

晤錢香土方

伯斡吳竹如廉訪

廷棟

二十二日接道篆

篆文曰分巡直隸  
保定等處地方兼

管河道  
關防 并

勅書手繪所屬府州縣河道圖有觀察畿南筆記六月眷屬盡室  
南來七月初三日以山長陸小雅病篤權蓮池書院齋課  
九月十九日接節相永定河工次來函言南北路賑務恭  
錄

上諭著派按察使吳廷棟清河道董醇分路稽查督飭屬員核實  
散放務使災黎實惠均霑於時被水災區南路以開州東明長  
垣爲重北路以固安永清東安爲重醇分得北路十月初  
十日出省歷固安永清東安并分委赴霸州保定事竣十

一月杪回省節相以辦理安速色喜因問來春加賑事宜  
答以察看大賑後民氣益覺安恬加賑似屬可緩如仰體  
皇仁必辦加賑竊願有請公問何請曰向例原報六分災以上者  
分別加賑一二三月其五分災則無此次大賑內有五分  
災民若來春彼有此無必生怨讟如照從前通融辦法分  
彼之有益此之無則冊外既有得錢之人冊中之人所得  
卽有不滿之數將使用成虛設儻有侵漁無從稽考擬請  
五分災民按照六分災民加賑一月之數減半酌給半月  
旣免向隅亦無遷就庶冊載之數皆按名實得之數將來

覆核不難公領焉據詳入告得

旨允行是年讀律例統纂集成自六月十一日起至八月十六日

讀竣並圈註訖是年四月二十四日女荅子歸同里齊幹

廷少府

諱之楨

子長鴻

七年丁巳五十一歲

二月二日蓮池書院甄別節相諭擬題閱卷

舉貢生題爲子曰居之無

倦行之以忠子曰博學於文約之以禮賦得一樹梨花落  
晚風得飛字童生題爲蓋釋格物致知之義賦得故人家  
在桃花岸有蓮池書院監試感賦詩時節相以大拜入閣  
得莊字

月杪公餞於洞陽宮上年十月九日欽奉酌加賑濟仍責

成吳廷棟董醇等飭屬妥爲經理

諭旨至是於三月三日出省仍赴北路遵飭分辦十九差旋謁譚

竹崖制帥

諱廷襄諡端恪時權督篆已於月之十二日接署

四月奏派前往易州

督率地方官辦理

孝靜康慈皇后永遠奉安例辦事宜五月奉文設水利局委員分

挑馬道河富官營石溝村河工竣驗收權舟東西兩淀周

厯各河手繪大清河源流圖爲正副帙並跋歸而上其正

帙於制府七月代方伯月課蓮池書院時南三府有警初

五日夜奉劄委勘正定冀趙深定情形初七日制府來晤

諭以禦寇當在門庭之外遂於初十日出省沿途接晤所屬守牧各縣商辦團練安撫事宜十八日入大名道屬順德府邢臺縣境駐府城爲行營給徐孟卿太守志導鈴記令赴正定分督後路兵制帥函來以党徐姜三游擊歸節制党雨三霖徐端亭因令姜游戎赴鉅鹿接管党所領兵八廷楷姜雅齋國仲

月十日奉省劄開恭錄

上諭前據譚廷襄奏直隸順德廣平各屬與豫東交界地方有游匪勾結土匪滋事經該督調兵捕拿並委清河道董醇前往督辦因思該處滋事匪徒固當嚴辦其被難貧民尤應妥爲安撫

應如何設法籌賑卽責成該道董醇督同該地方官妥辦副將  
達年管帶官兵應否飭赴順廣彈壓著體察情形調撥劄到欽  
遵稟辦等因溯自駐營以來分遣各弁兵扼要屯紮防捕

校閱在城兵丁義勇團勇捐廉獎賞用邢臺令榮鳳樓

誥

藉團助賑策協力勸團分廠賑粥用徐孟卿太守連疆會

哨策分檄各路舉行晉撫恆月川中丞

福諡恭勤

函來言願爲

唇齒一氣至是官紳聯絡頗著聲勢民氣漸臻靜謐趙平

山太守

楨生

刻已出示舉行順屬府試學使李古廉

清鳳

亦脾

飭順廣卽行院試迴非從前商旅不通情形此其明證奉

劄後卽以前情聲覆并請免調該副將一軍致滋靡費九

月十九日戮首犯張三黑賈洛洸於市獲張犯者廣宗廩

生王竹溪也

隆興

賈則廣宗吳令

光鼎

所獲時各廠賑粥如前

倉糧不足捐廉助之十一月朔古廉學使試順屬文武生

童畢辭赴廣平自是分日校閱邢臺沙河南和內邱任縣

平鄉廣宗鉅鹿唐山各縣勇並順德正定兩營兵分別獎

飭有差十二月十七日正定兵遣撤歸伍十九日起程旋

省沿途閱所屬團勇二十三日上院銷差是役也往返千

一百餘里閱時百六十餘日獲百數十人置三十六人於



法餘責釋有差是役也蜚文馳檄皆出幕賓孫竹堂

達士手

營次有校閱邢臺諭諸父老并紀事各詩有畿南會哨記

比年以來大名府屬開東長三州縣歲需賑銀十六七萬  
今順德廣平兩府所屬州縣計十有九設照此例勢須百  
萬藩庫實無此款且恐不如粥賑之得  
實是以仍守前議一力肩承幸無貽誤  
二十五日奉堂諭

辦交代局事是年五月二十四日子荅殤閏五月初二日

女荏殤十一月十七日子荃生

八年戊午五十二歲

二月二十七日王竹溪所購勇獲大德和尚於武強之小  
範鎮押解來轅稟請制府覆訊畢戮於市廣宗首犯三去

冬獲其二至是全獲三月制府奉

旨實授督篆時方移節駐天津月前方伯赴津諭醇代辦藩司事

至是復奉諭會同清輔廷廉訪盛於四月望赴院署代辦

秋審過堂六月二日詣蓮池書院奉制府函囑代辦決科

并奉奏派酌辦釐金劄調赴津遂於初五日起程卽於舟

中閱卷初九日晤制府指授各節并繳決科卷訖退僑於

郡城試院道光丙午年隨節長蘆舊地也尋星使瑞澄泉

師來諱麟贈太保諡文莊於二十二日接署督篆翌日送竹崖制府

於上蒲口苑枯異致感慨係之七月十七日僧邸來津迓

於桃花口旋詣西關晤新方伯文星崖煜星使言僧邸派

清河道設局雙港支應兵餉復晤僧邸於舟次並營務處

增雲軒慶文案處瑞秋禮兩翼長自是遂僑城東關外

張秀岩錦別業星使以上年清河道董醇督飭兵勇將順

廣境內匪徒撲滅地方肅清入奏二十八日欽奉

恩諭賞戴花翎單開出力文武員弁獎敘有差八月朔慶雲舫制

府接直隸督篆九月四日奉院行以上年丁巳捐輸永定河

經費議敘隨帶加一級尋常加一級紀錄三次十月二十

一日奉

上諭順天府府尹著董醇補授十一月朔拜摺謝

恩並陳明現管海防善後總局事務情形旋經料理清楚回省於

初十日交卸道篆十四日抵京翌日

召見養心殿後入署接尹篆時兼尹爲張詩船

諱祥和府丞毛煦

初諱祖熙十八日

天壇大祀奏報得雪月杪眷屬自省垣來十二月八日起

先農壇會同太常寺堂官恭納玉粒於

神倉是日制府以辦理海防出力員弁請獎奏到奉

上諭本年天津辦理海防尤爲出力之升任順天府府尹董醇著

交部議敘翌日謝

恩嗣吏部議上

次年己未  
八月五日奉

旨董醇著隨帶加一級十三日

御門府尹遞牌聽起向不入班是月以前年

丙辰

捐輸永定河工經

費移獎子蓮議敘中書科中書

九年己未五十三歲

元旦令節朝服入內候

駕陞殿朝賀畢詣府學

文廟

文丞相祠拈香登明倫堂行禮

坐班宣講

聖諭廣訓回署詣 五聖祠 八蜡廟 包公祠拈香少憩迎春

東郊初二日立春寅僚咸朝服同禮部堂官進春山寶座  
自本月二十日起於本署後苑演耕詳保釐京兆筆記十  
三日甄別金臺書院三月五日

先農壇遣祭順天府照外省督撫之例行耕藉禮兼尹府尹府丞  
治中通判大興宛平凡七區四月二十五日朝服入內候  
御太和殿朝賀臚唱畢迎鼎甲孫家鼐孫念祖李文田於東安門  
外簪花進爵立飲訖回署燕於府大堂旋釋朝服更補褂  
送狀元歸第如儀六月初九日赴園叩祝

萬壽時味國使臣將來議館之於老君堂地方官房是月奉  
諭著派順天府豫備供給以嘉興寺爲

欽派大臣接晤公所七月八日禮部奏派文鄉試滿漢監臨奉

旨派寶鋆董醇

佩珩同年時  
官戶部侍郎

八月六日入闈中秋佳節士子完卷

既夥第是夕例不開門漸乃拇戰擲笛升屋高歌馴不可  
制本年剴切示禁復逐號親往面諭猶或曰笑存之比月  
初上故態復作歌聲雜遝旋止旋起呵之不顧扶出餘字  
號二人并枷號軍以徇衆乃定當二人之乘柵欄而歌也  
其一見監試陳心泉來聲益高欲拘之竄入衆中而逸提

調責號軍索之不可得恟聞聲趨往令號官入號諭於衆  
同號能舉之則坐一人同號不舉則查明坐號底冊扣除  
闔號試卷均不謄錄俄而號底指前十號第二號以下羣  
指首號首號復指第三十四號遂飭扶二人出交督門官  
監試陸眉生慮衆不盡曉因令押號軍周厯詳述於是終  
夜肅然無敢譁者爲數十年來所未有蓋扣卷爲攻心之  
藥枷號軍以徇又藥中之引也引藥旣得痼疾以瘳十九  
日宗室場畢漢監臨赴圍覆

命



召見勤政殿問闈中前事

臣

醇據實直陳並叩首言

臣

等公商是

科本

恩科該生等對衆扶出已示薄懲因仰體

皇仁念其三場辛苦卷已早完仍予謄錄

上領焉復叩首而退尋復齋印入闈填宗室榜九月初八日入闈

填鄉試全榜翌日同出闈覆

命詳見秋闈瑣記十月初四日武鄉試奉

硃筆列字圍著董醇校射有武闈校射恭紀詩有武闈瑣記本圍

監射爲瑞芝生

諱常贈太保諡文端時官刑部尙書

監試御史朱錦堂

夢元客

歲杪作荻芬書屋試帖序於尹署空青水碧齋是年春作  
荻芬書屋賦稟序於佳晴喜雨快雪之亭有京兆聽事後  
棗林記

十年庚申五十四歲

元旦令節頒

萬壽恩詔行慶賀禮午初

賜宴太和殿

臣

醇列丹墀下西班十二日迎春東郊翌日立春進

春山寶座如禮二月二十六日女蕤生是月曾姬來三月

二十三日祭

先農壇

親臨耕藉

臣

祥河

臣

醇進鞭

臣

昶熙捧穀種青箱四月二十二日

御正大光明殿傳臚皆蟒服兼尹赴東長安門爲鼎甲鍾駿聲林

彭年歐陽保極簪花府尹歸署主宴送狀元歸第如儀六

月九日赴園叩祝

萬壽月杪奉

諭派員督辦通州糧臺並奉會同辦理團練

諭七月二日奏派霸昌道英鍾山

毓

督辦通州糧臺并片奏劄調

候補道振仁齋

麟

來京聽候差委初十日會同督辦順天

直隸團練大臣桑柏儕

諱春榮諡文恪  
時官內閣學士

具奏團練情形二

十二日

召見據實陳奏時以海氛日棘聞有

巡幸木蘭之舉於二十七日會同卿貳諸臣聯銜封奏力闢此議

翌日奉

上諭所有軍營備用車馬著欽派王大臣等傳諭各處卽行分別

發還毋得盡行扣留守候以息浮言而定人心事載文文忠公

自訂年譜甚詳八月初八日黎明聞前三門不啟惟啟西

直門

聖駕業經

啟鑾亟出示安民如有乘機搶掠立即就地正法一面諭治中蔣

大鏞傳知所屬及候補各員非奉差遣擅出都門一步即

行嚴參事稍定聞文博川新權執金吾

諱祥贈太傅諡文忠時以軍機大臣

留署提督未隨扈

乃往晤於城上商明文武兩衙門一律辦理仍

嚴催大興宛平兩縣及各委員車運熟食接濟僧王大營

並趕緊轉運巡防處軍械器具上城幸均就緒十四日留

京辦事大臣周芝臺相國

諱祖培諡文勤

邀赴閣議事翌日恭親

王燕山師博川大金吾邀赴園議事先是初十日以誤車

奉

硃諭摘去頂戴嗣以撫局既定

賞還二十二日奉恭邸文令豫備嘉興寺爲公所是夜圓明園火

九月朔 文廟拈香宣講

聖諭如儀是日恭邸駐天甯寺尹署於前月杪具奏車輛情形並

恭請

回鑾先期豫備初三日接奉

硃批覽撫局已成朕卽回鑾此時不必豫爲降旨況回鑾橋道不

過畧加修葺無虞趕辦不及欽此十一日晤恭邸於禮部大堂

是日英國議約成翌日法國議約成十八日赴瑞應寺上年武闈校射退休公所也恭邸始遷於此二十二日拜發

開復頂戴謝

恩摺二十八日赴內閣會同朝臣拜發迎

鑾摺十月十四日恭邸移嘉興寺十一月二十五日欽奉

恩旨兼管順天府府尹張祥河著從優議敘順天府府尹董醇著加恩賞給二品頂戴在事出力委員獎勵有差洋人之入安定門也順天所屬雖候補無一走避者

聖鑒及此感激涕零二十七日發謝

恩并報雪摺十二月二十四日迎春東郊翌日進春山寶座二十

六日赴內閣跪

安并拜發新年元旦賀摺是年幕賓惟趙小山通家熙和以校對江

北運程書守不去豫以遺言作札寄其家次年事大定乃

告歸是年元旦恭遇

覃恩時臣醇以順天府府尹加三級

誥貤贈臣曾祖資政大夫如臣醇官曾祖母爲夫人

誥贈臣祖父父資政大夫如臣醇官祖母母夫人

十一年辛酉五十五歲



駐蹕木蘭元旦令節朝服赴午門朝賀月杪補纂江北運程四十

卷初稟成二月十一日奉

上諭戶部奏試辦黑地升科著派陳孚恩寶璽會同張祥河董醇認真查辦十八日會議於三庫大堂越日會奏二十九日詣

先農壇行耕藉禮凡七區各九推兼尹府尹府丞治中四區先以御用黃牛演四推再以三王九卿黑牛補五推共成九推府丞毛

煦初於上年辦團回籍時吳荔裳同年

存義

攝丞篆四月二

十七日爲子蓮娶江右冢宰萬蒲齡同年

青藜諡文敏

女六月

初九日赴午門叩祝

萬壽二十六日會同桑柏儕奏請通州團練紳士獎勵七月朔禮

部發報奏派文鄉試滿漢監臨奉

旨派靈桂董醇

薊生相國時官刑部左侍郎

翌日赴金臺書院季考兼決科正

辦場務間驚聞十七日

文宗顯皇帝於木蘭上賓二十日奉文隆宗門齊集成服舉哀尹

署自二十一起率屬舉哀三日二十二日奉

上諭本年順天鄉試著展期於九月內舉行二十六七兩日縞素

赴學政署會考優貢與考者二十六人嗣許文鏞李如松

齊繼坡金士梁裘德傑馬恩培先後來見八月朔奉太常

寺文素服緯帽祭

至聖先師畢回署時日初升如兩鏡相摩內一明外一稍暗明者時於暗者之四旁迸露光芒先是六月間欽天監奏是日日月合璧五星聯珠以此初五日補奏月摺拜摺恭請聖安翌日五城約赴松筠庵議當鋪事二十六日率屬於大門外跪迎

遺詔安設大堂三跪九叩宣讀畢舉哀復三跪九叩退班九月六日偕靈薌生入闈辦理監臨事務十八日漢監臨出闈二十六日齋印入闈填宗室榜翌日出德勝門二十八日接

駕於南石槽翌日馳赴功德林

駕進德勝門叩接關廂北三十日遞全牌請

安十月朔硃卷前十本進呈還送貢院訖馳赴清河橋北行館翌

日

梓宮到清河叩接舉哀步行隨至尹各莊初三日

駕至德勝門百官隨同叩接

梓宮於關廂外馳赴東華門進景運門行禮初四日赴內閣會議

垂簾事宜翌日集內閣議載垣端華肅順罪尋聯銜奏上三罪伏

法初八日奉

上諭戶部右侍郎著董醇補授時管理戶部大學士爲周芝臺祖培

正堂瑞芝生常沈朗亭兆霖諡文忠左堂文博川祥梁海樓瀚

右堂寶佩珩盦朗亭旋出差以大司寇趙蓉舫光諡文恪兼署

海樓視學江蘇以少司馬畢東河道兼署詳佐理司農筆

記計部庫歲需銀千一二百萬兩時內庫封存銀五十餘

萬兩部庫實存銀七萬餘兩今膺此任臨深履薄未知何

以報稱初九日

穆宗毅皇帝登極入內朝賀並具摺謝

恩是日奉

上諭順天府府尹著毛昶熙補授未到任以前仍著董醇兼署翌  
日齋印入闈填榜十一日出闈闈事詳秋闈瑣記十二日  
覆

命並謝兼署府尹

恩是日戶部奏事並片奏臣醇查臣名與

御名字音相同字義亦復相近雖功令在所不禁於臣心實有未

安擬請改避以申誠敬遂更名恂十三日

梓宮奉安觀德殿漢大臣跪於沙灘入景山東門候奉安畢隨同

行禮二十三日奉

派閱順天鄉試覆試卷二十六日會奏

垂簾聽政禮節二十八日奉

上諭總理各國事務衙門前經

皇考大行皇帝特派桂良文祥崇綸恆祺隨同恭親王辦理著再添派軍機大臣戶部右侍郎寶鋆戶部右侍郎董恂在總理各國事務衙門辦理一切事宜二十九日尹署奏請派武鄉試監

臨奏事處傳

旨派董恂十一月朔兩宮

皇太后垂簾聽政入內行禮謝

恩午刻同赴總理署拜印總理有署有印自是始日赴總理署即  
自是始初四日奉

派列字園較射監射爲瑞芝生監試御史載德<sub>馨</sub>較射訖入闈

監臨十八日覆

命事詳武闈瑣記二十日萬滿舫以署兼尹陳明兒女姻親一節

是日煦初改僕正尹缺授石襄臣<sub>贊</sub>是月奉

派驗看月官十二月初九日尹署京察過堂翌日戶部京察過堂

十三日卸尹篆交襄臣十六日奉

派驗放兩翼世職自後月數驗放不悉記是月自尹署僑署後福



綏庭興間宅是年十月初九日恭遇

覃恩臣

曾祖父

祖父

父均以臣

恂戶部右侍郎加四級

誥贈光祿大夫如臣

恂官

曾祖母

祖母母

誥贈一品夫人

臣恂

誥授光祿大夫妻談氏

誥贈一品夫人葉氏

誥封一品夫人

同治元年壬戌五十六歲

朝賀正朔赴

慈甯宮

乾清宮行禮十六七日總理署挑左右翼學生備入同文館

學習二十四日遷西堂子衚衕路北二月初四日奉

派考試內閣中書並漢謄錄同事爲朱桐軒師阜蔭方同年

保十

一日出闈覆

命中書一項計取四十六名聲請

鈐印記名自周之翰至李汝霖前三十名於十二日奉

旨均著以內閣中書用詳見文緣瑣記先是初五日奉

派兼署兵部左侍郎

王笑山發桂典  
試貴州差缺

初九日

派管理馬館事務統於出闈日謝

恩時管理兵部爲賈筠堂相國

諱楨贈太保諡文端

正堂愛麗泉

仁諡清恪

萬蕩

舫左堂勝克齋

保

督兵在外以裕集庵

瑞

署右堂察劍泉

杭

同日到任彭雪琴

玉麟

督兵在外以桑伯儕署出闈之日

夜子初女荔生曾姬出二十日奉

派管理戶部三庫事務翌日謝

恩二十五日奉

派閱辛酉科各省鄉試補覆試卷三月十九日奉

派兼署吏部左侍郎

楊詒堂式穀視學差缺

二十三日

萬壽乾清門外補褂叩祝二十八日吏部以舉人應挑年分奏請  
欽派王大臣大挑

御章鈐出肅親王華豐周祖培阜保董恂裕瑞齊承彥三十日覆  
命四月十五日奉

派閱會試覆試卷十九日戶部署考送軍機章京是月奉

派驗看月官會同監盤銀庫五月初九日奉

派閱朝考卷是月奉

派驗看月官六月

鈐派督修

祈穀壇旋由戶部奏緩七月十二日

慈安皇太后萬壽慈甯門外行禮十九日奉

諭兼署禮部右侍郎

時毛煦初升補  
此缺現在軍營翌日謝

恩時禮部正堂倭崇庵

什琿布  
諡端恪

祁春圃師左堂察劍泉

杭阿  
沈經笙

桂芬右堂存立修誠諡是月奉

派驗看月官八月十一日起

壽康宮磨驗

慈安皇太后

慈禧皇太后兩宮冊寶十五日聯銜封奏以

梓宮奉移隆福寺暫安請停

躬送二十四日復合詞籲懇始奉近支親王恭代之

命自二十六日起赴總理署分日考試閣部院咨送人員以備傳

補總理署章京二十九日試畢通訂去取甲乙下月引

見四十八員內滿漢各奉

鈐出十四員閏八月初二日孫詔生子蓮萬氏出三歲以痘殤初

八日奏派禮部捧寶各執事堂官

鈐派倭什琿布察杭阿沈桂芬董恂十六日奉

諭兼署禮部左侍郎

時照初轉左  
仍在軍營

翌日謝

恩九月朔

孝靜成皇后升祔

太廟陪祀初三日

聖

親行告祭禮於

觀德殿偕倭崇庵展祭文禮畢赴天安門秋審上班翌日朝審

上班初五日赴總理署考試供事旋馳赴田村翌日

孝德顯皇后梓宮由田村奉移抵靜安莊恭理捧寶進夾損祭大

輦各事宜時經笙調戶左同事爲署禮右龐寶生

鍾璐諡文恪

初七日

觀德殿祖奠齊集偕存立修展祭文禮畢赴總署翌日夜馳赴

靜安莊候

親臨齊集初九日由靜安莊捧寶祭大舉徒行奉

孝德顯皇后梓宮至大橋東會合

文宗顯皇帝梓宮同行乃登輿沿途朝夕恭詣

蘆殿捧寶抵隆福寺

行宮奉安十三日享奠禮成折回十五日抵京接奉加級

恩旨翌日聯銜謝

恩請



安十七日三庫引

見二十二日張家口稅差引

見十月初十日

慈禧皇太后萬壽慈甯門外行禮十九日沈文忠公前奉

諭賜祭是日充使往祭二十六日奉

派覆試順天武舉赴南箭亭閱看馬步箭弓刀石十二月十一日

奉

派揀補陝西等處營員二十八日奉

諭署理三口通商大臣事務

時崇地山署直督篆赴畿南

翌日謝

恩總理署治事之所在大堂西偏後苑有古桑一株陰可蔭畝今  
夏補植一穉杏因顏其苑牆門外曰懷我好音內曰綠肥  
紅瘦之軒并爲神機營隸書門額

二年癸亥五十七歲

元旦偕龐寶生引表旋赴

慈甯門外

乾清門外朝賀如儀初九日請

訓十三日接奉

寄諭交查事件十五日起程十八日接篆望

闕謝

恩拜到任摺并奏調隨員文潔溪

廉時服闋以知府候補

來津二月二十八

日覆奏交查事件完結三月十二日交卸署篆拜摺翌日

起程崇地山克華廷

明時官長蘆運使

李雲生

同文時官天津道

於西沽

茶座跪請

聖安十五日抵京翌日跪

安二十三日

萬壽乾清門外叩祝翌日繙譯進士覆試赴中左門點名給卷是

月奉

派驗看月官四月十五日奉

派閱會試覆試卷二十四日奉

派察看殿試卷標識二十九日奉

派閱朝考卷均詳文緣瑣記五月初十日同鄉公謝江蘇崑山等

縣豁免錢糧

恩自張溫 and 彭文敬翁文端師後恂遂以戶部侍郎領銜承辦歲  
有數舉後不悉記七月朔總理署覈對洋務紀事本末自  
是日起有總理署校檔詩十二日

慈安皇太后萬壽慈甯門外行禮是月奉

派驗看月官二十九日欽奉

頒賞王大臣

文宗顯皇帝詩文全集翌日聯銜謝

恩九月初五日奉

派揀發陝西知縣等官初八日同文館考試教習二十四日公餞

洋將阿思本初以髮逆踞金陵久未之殲也或進策購洋

船洋礮卽以洋將領之繼而司事者持閫以外將軍主之

之說堅不受命雖各國公使亦不謂然乃往復辯論凡五

閱月中間復與恆子久奔馳各館數晝夜至是事始解十

月初五日李泰國罷總稅務司以其副赫樂彬德接辦十

月初十日

慈禧皇太后萬壽慈甯門外行禮十五日赴

觀德殿釋服如儀二十一日引

見山海關稅差十一月二十八日赴神機營閱洋槍隊上年俄國

所進槍萬桿為編號十日成功資利器威遠助先聲十二

月初二三兩日戶部京察過堂時同事管理戶部大學士

為倭良峯相國

諱仁贈太保諡文端

正堂寶佩珩羅椒生

諱惇衍諡文恪左

堂阜蔭方吳竹如

沈經笙署晉撫吳署沈缺

右堂崇沛如

綸諡勤恪

初四日

三庫京察過堂時同事爲賈筠堂相國寶珩尙書載鶴  
峯總憲蔭方竹如兩侍郎是年九月杪江北運程稟第二

次錄竣

三年甲子五十八歲

元旦朝服赴

慈甯宮

太和殿朝賀二十六日聯銜謝京察照舊供職

恩二月初二日出德勝門閱洋槍隊神機營新製槍復爲編號十  
日協力清寰宇臚歡慶履平初十日奉

派揀選陝西等處營員三月二十三日

萬壽乾清門外叩祝是月奉

派驗看月官五月初九日戶部工程完竣懸挂大堂

御製九式經邦匾額補掛行禮額本雍正

御製同治

御筆重書二十八日引

見殺虎口稅差六月杪金陵克復紅旗報捷七月初二日奉

旨中外臣工各加一級翌日復奉

旨戶部兵部堂官交部議敘初五日戶部聯銜謝議敘



恩初七日蟒服內閣領銜上賀表並謝加一級

恩旋赴總理署題洋將戈提督登

御賜酬功章服圖籤十二日

慈安皇太后萬壽慈甯門外朝服行禮二十四日奉

諭兼署吏部左侍郎

宜春雨振視學差缺

二十五日謝

恩時恭纂

文宗顯皇帝實錄是日奉

上諭董恂著充

實錄館副總裁翌日謝

自是時赴館恭閱不悉記八月朔奉

派考試廕生閱卷初三日奉

派覆勘各省鄉試卷本年順天鄉試先經奉

派龍門內稽查接談換卷等弊遵於初八十一十四十七等日入

闈會同監臨辦理均於各次日覆

命二十七日赴總理署考供事九月初三日考試同文館學生初

五日奉

派覆覈刑部秋審冊初十日引

見張家口稅差是日軍機交片面奉

諭旨戶部纂修則例請簡派本部堂官勘定底本著派董恂十七

日奉

派閱順天鄉試覆試卷十九日奉

派覆勘順天鄉試卷翌日覆

命覆勘各省鄉試卷不悉記是月奉

派驗看月官十月初十日

慈禧皇太后萬壽慈甯門外朝服行禮是月復奉

派驗看月官二十九日考試同文館學生十一月二十五日出安

定門閱威遠隊自二十六至二十九日總理署考試閣部

院咨送人員備充總理署章京計取滿漢各三十名十二

月初五日引

見滿漢各

鈐用二十名月前工部奏請奉

派查銷黃檔是月二十四日覆

命

四年乙丑五十九歲

元旦令節朝賀如儀十八日繪朝回補讀圖二十五日總

理署奏事前爲同文館總教習丁冠西

遼

作萬國公法序

是日進呈

御覽二月初十日引

見寶源局差坐糧廳差倉差二十五日奉

派閱補甲子科鄉試覆試卷先經奉

派會試磚門搜檢遵於三月初八十一十四等日前往會同辦理

二十一日奉

派閱續補鄉試覆試卷二十三日

萬壽乾清門外叩祝是月奉

派驗看月官四月二十日

殿試讀卷

鈐派瑞常朱鳳標董恂綿宜畢道遠桑春榮延煦景霖計應試二百六十五卷二十四日進呈前十卷

召見拆封爲崇綺于建章楊霽牛瑄羅家劭沈成烈松森韋業祥

張清華吳仁傑

國朝以旗籍得鼎甲魁天下授修撰自是科始詳文緣瑣記

曰

太和殿傳臚朝賀如儀二十九日奉

派閱朝考卷閏五月初二日遷無量太衡衢路北自尹署至此亦

三遷十五日繼室葉夫人去世請假六月朔移停天仙庵  
是月奉

派驗看月官比利時國遣使來津懇立通商條約七月十一日奉  
上諭著派董恂崇厚作爲全權大臣便宜行事辦理該國通商事  
務欽此比國使臣名金德僑於英館英國柏卓安爲之繙譯自  
是日來議約十二日

慈安皇太后萬壽慈甯門外叩祝八月奉

派驗看月官九月十四日比國條約奏上奉

旨依議欽此自館回署柏卓安介金德來畫押用印訖恭邸來宴

於茶半香初亭是日奏事後赴

實錄館恭閱

聖訓畢十七日

皇上奉兩宮

皇太后啟鑾祇謁

山陵跪送朝陽門外新橋之東

定陵永安禮成

回鑾二十四日跪接燕郊鎮之東二十六日同入內遞全牌請

安十月初三日前三太僕寺卿徐松龕

繼奉



諭在總理各國事務衙門行走松龕嘗撰瀛環志畧至是囑恂爲之序初十日

慈禧皇太后萬壽慈甯門外叩祝十一十二十三等日大考同文館諸生十一月初三日譚竹崖以刑部右侍郎奉

諭在總理各國事務衙門行走爲跋竹餘小隱額并書十一日奉上諭都察院左都御史著董恂補授翌日謝

恩十二日引

見滿中東北城差漢東城差十六日蒙

賞福字二十七日

賞荷包二十八日

賞麕鹿以上三項自是歲蒙

恩賞是年六月作誠恕厚重四箴誠子蓮九月初四日進曾姬爲

筵室十二月十七日孫女恩哥生子蓮萬氏出四歲殤

五年丙寅六十歲

元旦朝賀時以期服例不朝服入班候

駕受賀還宮訖改於

乾清門外蟒袍補褂行禮十五日

賜宴保和殿外藩及滿一二品漢一品皆入宴自是歲咸與焉皆

蟒袍補褂二十七日命子蓮扶其母葉夫人櫬回籍葬新塋豫作教十則以誡之於是日起程二月朔

坤甯宮喫肉自是歲皆與三月初九日引

見滿漢南城差十五日總理署奏旁觀論新議畧論二十三日

萬壽蟒袍補褂叩祝於

乾清宮甬道是月奉

派驗看月官二十七日奉

上諭兵部尙書著董恂補授翌日入內謝

恩候

駕自

太廟回於景運門內西向叩首時兵部同事管理大學士爲賈筠

堂相國滿正堂載鶴峯

齡

左堂載鶴峯

驚署崇地山厚差缺

畢東河

道右堂伊禮堂

精

黃恕咳

倬署彭雪琴玉麟差缺

有職掌戎樞筆記

四月初四日以時疹病臥請假連日昏沈一合眼卽與俄

羅斯爭論黑龍江事糾紛不已又以水經注長篇大論語

多難解云係古文可靠深恨學識淺陋不能通正在椎胸

頓足適得大汗如雨而寤寤時已初六日寅初聞後堂哭

聲則二媳萬氏於前數日病至是以疹閉不出亡矣時蓮

兒猶在南也輓之以聯曰姑嫜地下應相慰夫婿天涯尙  
未歸臥不能起西賓代書次年始由廣惠寺送歸籍葬新  
塋二十五日銷假同鄉謝蠲免錢糧

恩五月初二日謝香器荷包

賞六月十二日挑取同文館學生是月奉

派驗看月官七月十二日

慈安皇太后萬壽

慈甯宮叩祝

甯壽宮聽戲

賞賚有差二十九日孫讓生子蓮章姬出八月初四日以臣恂六

十生辰蒙

恩賜壽前一曰

欽派天使上駟院卿誠明偕堂派副使營造司員外郎恆杰以

御仗龍旂導黃亭一座綵亭三座至臣恂率子萇跪迎於大門外

並豫以鼓樂宮燈迓於途比迎入中堂恭照單開

恩賞古佛一尊

御筆周甲延釐匾一面福壽字各一方紫檀嵌玉如意一柄玉瓷

古銅陳設四件蟒袍面一件小卷八絲緞二疋小卷江綢

二疋紡絲二疋春綢二疋分別安挂鋪陳畢

臣

恂北面跪

天使授如意

臣

恂跪受安案上行三跪九叩首禮畢延入宴送酒

樂作卒爵興辭

臣

恂率子萇跪送於大門外翌日蟒服入

內恭謝

天恩有六旬

賜壽紀

恩詩十九日子蓮歸自邵女蘭同來甯趙小山亦偕來有喜晤小

山西席入都詩二十九日以子蓮所出孫讓嗣故豕男蓉

承大宗九月杪奉

派繙譯場搜檢十月朔

坤甯宮喫肉自是歲皆與焉是日搜檢同覆

命初十日

慈禧皇太后萬壽叩祝如儀十七日蒙

賞紫禁城騎馬翌日謝

恩十一月初四日漢部曹考試御史奉

派擬題

恭擬進德修業論養民之道在愛民力策

有南書房郎事口占詩旋赴同文館

歲考十月初四日兵部京察過堂初七日進

實錄初八日



受書禮成朝賀如儀翌日謝加三級

恩十七日出安定門大閱威遠隊三千人二十四日代奏

實錄館官同謝議敘

恩是年爲斌友松

椿

作海國勝遊草序友松以總署章京奉文采

風周歷各國九萬餘里實爲中國使臣出洋濫觴伊犁之  
將爲回陷也守臣求濟師愚謂文文忠必速濟之文忠答  
以回何足患得一勝仗卽勢如破竹曰愚非此之患患肘  
腋間有覬覦者他日以得自回人手爲辭何以折之尋又  
有求助俄兵之請愚以爲此斷不可行外國之用兵也其

費倍於中國我不給費豈爲我用若有此費我豈無人愚之所患者伊誰若之何開門而揖之乃伊犁旣陷旋攫之去竟婉其辭爲代守伊犁之說



還讀我書室老人手訂年譜

同治六年丁卯六十一歲

元旦

慈甯宮

太和殿朝賀如儀十五日

賜保和殿上元宴後十六日

賜乾清宮廷臣宴四大學士十二尙書滿東漢西共八筵皆染貂

冠蟒袍補褂入座樂作演劇於

丹陛上

賞資八色於闕外頓首謝候

駕興樂止乃退二十六日聯銜謝照舊供職

恩二月十七日以

實錄告成筵宴禮部大堂

賞資鞍馬銀幣有差翌日聯銜謝

恩二十八日夜雪是日宴廳疊斐麗本故法王孫時在英爲寓公

有春雪宴故法王孫詩三月初十日先是

實錄館於月前奏派恭填

廟諱

御名

鈐出賈楨周祖培寶璫董恂靈桂伊精阿察杭阿至是敬謹粘籤  
皆黃紙硃書三跪九叩禮畢監視包封翌日覆

命二十三日

萬壽赴

乾清宮蟒袍叩祝自昨日起兩日均赴

甯壽宮聽戲

賜御前果品及攢盒各事是日復

賞賚如意銅鑪瓷瓶蟒袍綢緞洋烟有差各於座叩謝退班自是

歲蒙此

賞四月八日偕博川沛如劉蔭渠長定靜村安赴德勝門外大教

場閱馬隊洋槍隊自二十五日至月杪兵部軍政分日引

見五月十六日恭送

實錄尊藏

皇史宬二十日同文館考試

題爲戴仁抱義論問射御書數名義策

七月十二日

慈安皇太后萬壽叩祝如儀九月十七日奉

派閱順天鄉試覆試卷正閱卷間恭邸令謁者來言總署有要事

約於文宅面議閱卷後出西長安門馳赴博川十九日先

於前月杪奉

派覆勘順天鄉試卷是日勘竣覆

命又先後覆勘各省試卷不悉記十月初十日

慈禧皇太后萬壽叩祝如儀十六日補考拔貢奉

派擬題

恭擬古之人所以大過人者無他焉善推其所爲而已矣賦得烟銷日出見漁村得村字十九日歲試

英館諸生月杪赴美館送蒲安臣出都時充中國使臣往

報英法諸國十一月朔總理署章京志克庵剛孫稼生家穀

賞二品銜稼生並

賞戴花翎會同蒲安臣出使授以



國書並以英人柏卓安法人德善充左右協理十月十二日考

試粵館咨送來京學生算學

問以觔求兩一條方  
程一條勾股一條

是年補

讀史記漢書後漢書早歲假書苦不易所讀史十不記一  
至是先後補讀焉然須公餘始讀之一暴十寒不免也

七年戊辰六十二歲

元旦令節朝服赴

慈甯宮

太和殿朝賀如儀二月望鄉試覆試貢院搜檢先期

鈐派翌日覆

命二十四日鄉試補覆試奉

派擬題

恭擬貴貴尊賢其義一也賦得鴨綠平隄湖水明得明字

二十七日鄉試續補覆試奉

派閱卷是日奉

上諭戶部尙書著董恂兼署

羅叔生奉天差缺

翌日謝

恩三月初二日鄉試再補覆試奉

派閱卷初六日蒙

恩充會試總裁以朱桐軒師爲正總裁

時以吏部尙書協辦大學士

文博川

時官

吏部尙書

暨恂與繼述堂

格時官左副都御史

副焉取中宗室寶廷恩景

二人蔡以瑞等二百七十二人四月十一日覆

命歸撰會試錄後序詳春闈瑣記閏四月子蓮由中書科中書改

主事簽分刑部湖廣司五月十二日同文館考試學習期  
滿學生六月二十六日拔貢朝考覆試奉

派擬題

恭擬忠告而善道之賦得  
雲近蓬萊常五色得萊字

七月十一日以捻逆削平接奉

恩旨賞加一級越日謝

恩十二日

慈安皇太后萬壽叩祝如儀九月朔赴館恭奉

聖訓

實錄監視襃箱三跪九叩翌日恭送於東華門外行禮初四日奉

派武會試宿字圍較射監射仍瑞芝生已三同圍矣監試爲王侍

御師

十七日赴兵部考送軍機

題爲偃武  
修文論

翌日考試同文

館教習十月初四日引

見殿試中式武舉九十八人翌日

升殿朝賀如儀初九日覆試同文館教習初十日

慈禧皇太后萬壽叩祝如儀旋赴總理署覆試同文館學生十六

日總理署考試供事十一月十八日同文館教習補覆試

十二月初六七兩日同文館大考二十一日總理署奏修

約事宜請

飭親郡王大學士六部九卿閱看二十八日閱看會議奏上是年

補讀三國志晉書宋書南齊書

八年己巳六十三歲

元旦令節朝服赴

慈寧宮

太和殿朝賀如儀十六日廷臣宴先期有初與宴來問禮者聞

宮史有

乾清宮曲宴廷臣儀未之見也乃作儀畧答之廷臣宴蟒袍補

褂染貂帽白風毛宴設

乾清宮午正入座先於巳正二刻抵景運門朝房候

召入由甬道滿東漢西至丹陛分東西班立戲談外按坐次圖先

後爲序北面候

駕升御座樂作首領太監引入就墊一叩坐墊前茶席先已設齊

入席

賜飯及湯人各一

特賜御前饌席各一器

賜奶茶人各一

特賜時各就墊一叩食訖茶席撤去換果席

賜元宵人各五一叩食訖進酒者離席於榻外脫去外褂仍挂珠  
入中門跪時衆皆離席立太監實玉尊授進酒者進酒者  
興捧尊升矩步近

御座跪獻訖趨下於原處叩首衆皆就墊一叩興進酒者復升矩  
步接虛尊下於原處跪太監接尊酬以爵受爵一叩衆不  
叩進酒者出著褂入歸坐衆咸坐

賜盞杯酒人各一各就墊叩

賜松仁茶叩飲訖搭盤賞衆皆興出闕外橫排一跪三叩訖仍於  
戲毯外東西立北面樂作候

駕起退後得曲宴儀閱之乃知所敘鋪陳承應各執事甚詳而於

廷臣出入起跪諸儀則畧三月二十三日

萬壽叩祝於

乾清宮自昨日起

甯壽宮聽戲

賞賚有差六月十二日以奧斯馬加國使臣到津請互換條約奉  
上諭著派總理各國事務衙門大臣兵部尙書董恂三口通商大  
臣兵部左侍郎崇厚作爲全權大臣便宜行事辦理互換條約  
事宜時與國使臣爲畢慈副使史澤及其從赫弼嘉理治陶伯



雅來畢之英國雅安瑪爲之繙譯自是時來署籌議二十

一日

武英殿火率子蓮入內救護是日奉

上諭董恂著調補戶部尙書翌日謝

恩有權衡金粟筆記二十三日以子蓮隨同救護蒙

賞加一級率同入內謝

恩七月十二日

慈安皇太后萬壽叩祝如儀二十五日以奧國約事議定奏

聞翌日畫押蓋印勞以酒果月杪聞歸何宅女蕙於月之十三日

故於邵鎮八月九月均奉

鈐派驗看月官十月初九日沈經笙毛煦初均奉

派總理署行走本署章京成竹坪林在大臣上行走初十日

慈禧皇太后萬壽叩祝如儀十五日以出使大臣在美國續定條

約請派員互換奉

上諭著派總理各國事務大臣戶部尙書董恂作爲全權大臣便

宜行事辦理互換條約事宜駐京公使衛聽泉廉士來議於二十

一日蒞事十二月朔戶部京察過堂於次日畢十七十八

兩日考試同文館諸生十九日覆勘陝西本年補行丁卯

科鄉試卷翌日覆

命是年補讀梁書陳書南史北魏書北齊書周書隋書北史

九年庚午六十四歲

元旦朝賀如儀十七日敬事房本庫火馳往救護旋撲滅

是年移廷臣宴於是日緣此罷宴二十六日聯銜謝京察

照舊供職

恩二月初二日以承修

東陵工程請

訓歲杪奉

派初四日起程十二日回京跪

安有鳳臺祇謁筆記有發馬蘭峪詩三月二十三日

萬壽叩祝如儀自昨日起

甯壽宮聽戲

賞賚有差四月十六日奉

派閱考試差卷有賦得水竹會平分得分字擬作二十二日考

試同文館報考學生

題爲九功惟敘  
論登崇俊良策

二十五日考試廕生

奉

派擬題

恭擬管仲晏子  
論謨明弼諧策

六月初七日先是以祈雨由總理署函致

曾筵生通侯

時以大學士  
官直隸總督

請鐵牌於邯鄲至是得兩深透

赴

都城隍廟恭送鐵牌上年九月杪奏明覈覆軍需報銷章程

復於本年正月九日條列戶部軍需則例所載各款及兵

工二部軍需則例各若干條分析詳注申明分覈分奏前

議上

聞至是并請行知年來督辦軍務諸臣將所辦歷年各案軍需博

觀約取編纂成冊奏交會議恭候

欽定刊刻頒行永爲程式於是月十五日奏蒙

俞允二十五日

召見<sub>臣</sub>恂等自恭親王以下十九人七月十二日

慈安皇太后萬壽叩祝如儀十八日

召見恭親王寶鋆<sub>臣</sub>恂沈桂芬崇綸崇厚成林七人八月二十三

日奉

派承修

昭西陵專案工程十月初十日

慈禧皇太后萬壽叩祝如儀二十五日謝

頒賞

文宗顯皇帝聖訓

恩是月奉

派驗看月官志克庵孫稼生歸自遠洋三口通商大臣裁併直督

授爲

欽差大臣另設津海關道以總理署章京陳子敬欽署理夏間以

天津民教滋釁法國領事官豐大業等被戕紛曉不已無

分雨夜奔走各館至是大定閏十月初十一日以考試

筆政奉

派貢院搜檢十一月初十日戶部奏催各省趕辦新漕覈其辦理

漕運受兌之始卽多遲緩州縣舍米徵銀司道復另委員以銀易米市僧屯積米石擡價居奇委員等遲迴觀望祇求糴米之減價不問交兌之逾期卽如本年夏至後東省黃水暢盛如果江北糧船先到數日早已直達通州是轉運之遲滯實由開兌之遷延來歲新漕亟宜整頓欽奉

諭旨通飭遵行先是戊申壬子兩次海運共節省冗費歸公銀一百五十餘萬兩自癸丑以後至此歷十有八屆不聞此項歸公至是以直督常駐天津因請來年卽

令就近經理屆期毋庸復請



欽派大臣赴津督收於二十日奏奉

允准是月二十八九兩日考試同文館繙譯及算學格物論是年

讀唐書舊五代史新五代史

十年辛未六十五歲

元旦赴

慈甯宮

太和殿朝賀如儀二月初九日赴

東陵請

訓十九日回京跪

安有鳳臺于役十詠是月奉

派驗看月官三月初四日孫諸生子蓮郭姬出初六日奉

上諭工部尙書著董恂兼署

毛煦初會  
闡差缺

翌日謝

恩初八日赴貢院入龍門稽查接談換卷先於前月杪奉

派至是及十一十四十七下月十三等日前往均於各次日覆

命二十三日

萬壽聖節赴

乾清宮叩祝聽戲兩日均如儀是年

賞賚中有竹如意一柄上刊乾隆

御製五律一首 小臣紀

恩有敬謹步和

原韻詩二十七日吏部以舉人大挑奏請

欽派王大臣

御章鈐出禮親王世鐸惇親王瑞常董恂黃倬桑春榮四月朔覆  
命是日考試孝廉方正奉

派擬題

恭擬柔遠能邁策羽以象文德干以象武功疏 十六日奉

派閱會試覆試卷二十一日奉

派察看殿試卷標識二十九日奉

派閱朝考卷五月奉

派驗看月官六月二十五日奉

派閱朝考優貢卷得士六十二人七月十二日

慈安皇太后萬壽叩祝如儀二十七日戶部以放款太鉅亟宜力

求節省陳奏庫款支絀情形是月奉

派驗看月官八月初九日考試粵館咨送同文館學生十七日日

本使臣始來九月十八日奉

派磨勘武會試卷冊翌日覆

命十月初十日

慈禧皇太后萬壽叩祝如儀十一月初二日奉

派考試恩監生

題爲寬以居之仁以行之敬事而信論

初六日覆

命詳文緣瑣記初十日奉

派揀發副將等員二十七日起歲考同文館繙譯及算學化學二

十九日畢十二月十七日起程赴通先是前月杪與桂蓮

舫

清

同奉查勘裏河撥船之

旨旋於部中查案簡派隨員是日出東便門東行由通惠河南岸

查勘翌日出通州城西門西行復由通惠河北岸查勘二

十日覆

命是年補讀宋史遼史金史

十一年壬申六十六歲

元旦朝服赴

慈甯宮

乾清宮朝賀如儀二十六日崇地山歸自外洋覆

命是日奉

派總理署行走本署章京夏伯音

家錫

在大臣上行走二月二十日

寶佩珩同年約赴方巾巷崇正義塾商辦察課事宜二十

九日以承修

西陵工程請

訓前三日奉

派翌日起程三月初九日回京覆

命有永甯祇謁筆記二十三日

萬壽叩祝如儀自昨日起

甯壽宮聽戲

賞賚有差是月奉

派驗看月官四月二十日奉

派盤查戶部銀庫二十八日盤竣覆

命是月二十五日以度支亟宜撙節再陳庫款出入情形五月二十三日赴崇正義塾察課是月隸書重建平山堂記記爲蔣叔起超伯撰六月二十五日赴總理署偕崇地山更正奧國稅則章程是月奉

派驗看月官七月十二日

慈安皇太后萬壽叩祝如儀二十五日奉

派管理戶部三庫事務翌日謝

恩並驗放覆

命八月初七日奉



派覆覈刑部秋審冊十六日覆

命是日奉

派續修

西陵工程二十日起崇正義塾察課是月奉

派驗看月官九月初十日起

太和殿演禮自二月初三日欽奉

大婚禮

諭旨至是於十四日寅刻

太和殿行冊立禮申刻

太和殿行奉迎禮均朝服三跪九叩十八日

慈甯宮

太和殿行禮均朝服三跪九叩十九日

賜宴太和殿十月初五日考試漢廕生奉

派閱卷初八日恭上

慈安端裕皇太后

慈禧端佑皇太后徽號先期奉

派恭捧

冊寶至是禮成蒙

賞大綬二卷大小荷包各一對翌日

太和殿行禮頒

恩詔初十日

慈禧皇太后萬壽叩祝如儀翌日聯銜謝加一級

恩是日旋赴同文館考試學生自十四日起監試閣部院咨送備

充總理署章京人員十七日畢翌日偕煦初閱卷由經筵

覆覈計取滿漢各四十員下月初三日奉

鈐印記名各二十八員本月二十二日聯銜會奏

親政事宜是月奉

派驗看月官十一月十一日戶部奏稽覈三庫出納章程十二月

朔至初三日歲考同文館學生初三初四兩日戶部京察

過堂時同事爲載鶴峯齡志藹雲和潘伯寅祖桂蓮舫清

溫明叔葆十三日三庫京察過堂同事爲崇沛如綿佩卿

宜溫明叔志藹雲潘伯寅是年鎮江關查獲漏稅洋船更

名易主不遵驅逐一案紛囂不已愈執愈堅於其卒也恂

袖出一紙授之笑謂之曰何必爾閱此自明畧視卽攜去

已而文文忠來署問前件今何如矣曰結矣氣奪語塞矣

乃檢原稟請補閱并署其端曰商船犯章問內言商船走

私有犯約中嚴行驅除不准在口貿易之章者驅商耶驅船耶認商耶認船耶若以爲認商不認船設如商人趙甲有日字月字兩船均是此商之船內只日字船在此口犯章將僅驅此商之日字船耶抑因月字船亦屬犯章之商遂并驅之耶設如趙甲日字船犯章後售與錢乙而趙甲別置一星字船將來日字船抵口欲驅之不能也日字船犯章錢乙未犯章也星字船抵口欲驅之不能也趙甲犯章星字船未犯章也請問當驅何商當驅何船驅除之約不將虛設耶旣云認商不認船趙甲犯章其日字船旣以

易主而不可驅將轉而驅其未易主之月字船耶設本無此月字船將誰驅耶日字船既以出售而不可驅將改而驅其新置之星字船耶設未置此星字船將誰驅耶况月字船星字船必不受驅耶驅除之約不又虛設耶又如孫丙有天字船犯章李丁有地字船犯章周戊人字船不犯章吳己物字船不犯章孫李互易其船如欲驅之必曰商雖犯章之商而商之犯章非此船也船雖犯章之船而當其犯章之時我尙未爲此船主也其將誰驅耶又不然孫與周互易其船李與吳互易其船是各以犯章之商據不

犯章之船而各犯章之船各以不犯章之商庇之其又將誰驅耶驅除之約不更虛設耶請問高明必如何而後此約爲不虛設文忠讀而善之自是彼此來往絕口不言而本關已按約辦理矣可微辨而不可面數其道如此是年讀元史明史明史彙是年十月初九日恭遇

覃恩誥授

臣

爲光祿大夫戶部尙書加一級總理各國事務管理

三庫事務大臣

誥贈先曾祖父

祖父

父如

臣恂官

誥贈先曾祖母

祖母

母爲一品夫人妻談氏繼妻葉氏均一

品夫人

十二年癸酉六十七歲

元旦朝服赴

慈甯宮

太和殿朝賀如儀二十日赴閣會議請修會典奏臬二十五日

奏上並聯銜謝京察照舊供職

恩是日花衣

召見軍機此常起也以

皇上明日躬親大政先行



召見恭親王醇親王孚郡王御前大臣軍機大臣內務府大臣六

部尙書理藩院尙書共三十六人臣恂與焉當

諭以共矢公忠勿避嫌怨恪恭盡職宏濟艱難

至誠愷惻

詰誠諄諄臣等欽遵同頓首謝旋

召軍機重降

懿旨徧

諭中外大小臣工二十六日朝服恭詣

慈甯宮

太和殿朝賀

親政禮成二十八日聯銜謝加一級

恩是日先經奉

派驗看月官二十九日戶部正班瀝陳銀庫內務府情形

臣載齡

臣董恂同起

召見二月初九日恭上

慈安端裕康慶皇太后

慈禧端佑康頤皇太后徽號先期奉

派恭捧

冊寶至是禮成蒙

賞大緞二卷大小荷包各一對翌日

太和殿朝賀十一日

東陵收工請

訓蒙

召見東煖閣十九日回京跪

安是月奉

派驗看月官三月初五日

皇上啟鑾祇謁

東陵臣恂隨扈來往皆行裝

陵前行禮執事者青長袍褂行

大饗禮則朝服陪祀十二日

回宮翌日全牌請

安皆常服挂珠詳隨扈筆記二十三日

萬壽叩祝如儀自昨日起

甯壽宮聽戲

賞賚有差四月二十日奏

派查內銀庫緞匹庫顏料庫每庫查完隨時覆

命五月十一日始畢六月初四日起

紫光閣演禮前月奉有外國使臣准觀之

旨至是演禮時總理各國事務衙門隨恭親王同執事者爲臣文

祥寶璽毛昶熙董恂沈桂芬崇綸崇厚成林夏家鎬初五

日行

觀見禮卯初東洋使臣至

光明殿西洋使臣至蠶池口教堂卯正臣厚往遼東使臣林往

遼西使臣恂偕臣綸臣昶熙臣家鎬於福華門外引赴

時應宮辰正二刻

駕御紫光閣恭親王偕臣祥侍黃案後臣盩臣昶熙引東洋使臣

副島種臣并繙譯官鄭永甯由西階升至案前奉書致辭

恭親王傳

溫語答訖退臣恂臣桂芬臣綸臣厚引西洋五使臣并繙譯官璧

斯瑪升西階如前儀臣恂臣綸引俄美英和蘭四國使臣

倭良嘎哩鏤斐迪威安瑪費果孫并繙譯官退時臣桂芬

臣厚暨法國使臣熱福理猶在案前也臣林引法國繙譯

官德微理亞升如前儀訖退仍赴

時應宮少憩送出福華門禮畢是月奉

派驗看月官閏六月五日游朗潤園憩六十種蘭亭精舍七月初  
四日夜睡熟昏不知人所有囈語則爭天津民教案及覲  
見禮節也旋得透汗時疹大發遂請假乃汗透而疹猶未  
透延至初八日左股疽始萌芽不得已遂連續假十月二  
日銷假跪

安初十日

慈禧皇太后萬壽叩祝如儀是月十八日戶部奏通籌各省財賦  
以裕度支時內務府亟籌工程銀兩又有謂部中斂外藏  
以實京師有似唐之中葉者爰於月之十五二十九等日

迭陳庫款情形是月奉

派驗看月官十一月初四日起歲考同文館算學緝譯格物測算

化學醫學初七日畢二十六日覆勘各直省生員歲試一

等前列試卷翌日赴崇正義塾察課

題爲我非生而知之者賦得疏影橫斜水

清淺得二十八日覆勘覆

疏字

命旋赴

闕左門驗看月官是年補讀蕭氏續後漢書郝氏續後漢書周

氏晉畧

十三年甲戌六十八歲



元旦朝服赴

慈甯宮

太和殿朝賀如儀初三日查勘工程處以前派承修

朝日壇各工內有因事出缺之員今復增修

夕月壇

歷代帝王廟等工聲請應否添派奉

旨卽著董恂承修毋庸添派是月奉

派驗看月官二月十五日鄉試覆試奉

派搜檢二十二日補鄉試覆試奉

派閱卷三月初六日奉

上諭工部尙書著董恂兼署

李蘭孫鴻藻闈差缺

翌日謝

恩初八日赴貢院搜檢先於月前奉

派至是及十一十四十七等日前往均於各次日覆

命二十三日

萬壽叩祝如儀

甯壽宮聽戲

賞賚有差二十四日赴

慕陵查勘工程請

訓四月初二日回京跪

安初五日起福華門引俄國使臣布策并繙譯官柏百福

覲見紫光閣如儀初內務府復請部撥銀兩當將部庫情形瀝陳

并請

欽派會議於三月十六日奏上尋於二十四日奉

硃批毋庸會議儘數速撥至是於本月初六日再將部庫先顧月

需軍餉緣由瀝陳十五十八兩日繙譯場搜檢均於各次

日覆

命二十日

殿試讀卷奉

派毛昶熙董恂桑春榮賀壽慈黃倬徐桐龔自閎童華計應試三百三十七名二十四日進呈前十卷

召見拆封

欽定爲陸潤庠譚宗浚黃貽楫華金壽劉傳福檀璣馮光通翟伯恆張百熙何崇光詳文緣瑣記翌日

太和殿傳臚朝賀如儀二十八日奉

派朝考閱卷五月二十五日赴崇正義塾察課是月奉

派驗看月官六月朔奉

派磨勘優貢試卷翌日覆

命初七日考試拔貢奉

派貢院搜檢翌日覆

命二十一日拔貢朝考奉

派閱卷得士二百十八人是月奉

派驗看月官七月十二日

慈安皇太后萬壽叩祝如儀適談室女蘭自丙寅歲來甯久病未

還是日故於西院次年由天仙庵遣送遺櫬歸其家二十

日赴福華門引比利時國使臣謝惠施并緡譯官德微理

亞

覲見紫光閣如儀八月二十日內務府以前捐輸工程經費奏蒙  
移獎是日謝

恩尋議敘孫讓以主事歸部候選九月二十日子蓮以刑部主事  
加一級

覃恩貤封本生庶母曾氏爲宜人十月初五日武傳臚  
升殿朝賀如儀初十日

慈禧端佑康頤皇太后四旬萬壽先期進呈藍絳灰駝大緞八聯  
賞收屆期朝服赴

慈甯宮叩祝禮成更蟒服自初九日起

甯壽宮聽戲三日

賞賚八色各於坐次叩謝退二十一日引日本國使臣柳原前光

并繙譯官鄭永甯

觀見紫光閣如儀是月奉

派驗看月官十一月初二日爲子姪娶直隸冀州牧山右裴星甫

福德女時恭逢

皇上天花之喜一律蟒服挂紅十四日由奏事處傳

旨至明年二月十一日以前均蟒服入直十五日呈遞如意王公

及京外大小官員均

賞加二級二十日聯銜謝

恩自二十一起赴同文館考試天文算學緡洋譯漢及甄別并  
投考教習月杪覆勘各省歲考前列試卷十二月朔覆

命初五日酉刻

穆宗毅皇帝龍馭上賓是日卯刻猶蒙

派驗放差夜間驚聞此信馳往候門啟覆

命改赴內閣易服恭讀

遺詔旋赴



乾清門斂奠晡奠隨班行禮自是

乾清宮

觀德殿齊集上

尊諡

廟號諸典禮暨

垂簾事宜均恭載權衡金粟筆記

光緒元年乙亥六十九歲

正月二十日卯刻

皇上登極朝服入內朝賀如禮

恩詔加一級二十二日赴

觀德殿祇領

遺念歸設龕尊藏翌日聯銜謝加一級

恩是月奉

派驗看月官二十九日總署奏請會議二月二十日

大行嘉順皇后升遐是日已

派驗放差乃易服戴事俟下月朔覆

命申刻行斂奠禮自是

壽康宮

永思殿齊集諸典禮均恭載權衡金粟筆記三月初二日恭上  
穆宗毅皇帝冊寶赴

觀德殿行禮初三日

恩詔加一級翌日聯銜謝

恩四月十六日奉

派閱考試試差卷二十二日奉

派抖晾

實錄自二十六日至二十九日歲事五月朔覆

命十二日上

大行嘉順皇后尊諡曰

孝哲毅皇后赴

永思殿行禮十四日門神庫火乘騎往救是月奉

派驗看月官六月初八日

坤甯宮喫肉初次舉行皆蟒服二十八日

萬壽補褂行禮七月十二日

慈安皇太后萬壽蟒服行禮是月奉

派驗看月官八月初六日奉

上諭吏部尚書著董恂兼署

毛煦初入  
關差缺

十七日朝鮮使臣來叩

奠赴

觀德殿齊集行禮月杪奉

派覆覈刑部秋審冊九月初五日奏上十八日

皇上啟鑒奉

慈安端裕康慶皇太后

慈禧端佑康頤皇太后躬送

穆宗毅皇帝

孝哲毅皇后梓宮赴隆福寺

行宮暫安先於初八日奉

上諭著派惇親王大學士文祥尙書毛昶熙董恂阜保留京辦事惇親王毛昶熙董恂阜保四人分日輪班在內值宿至是入內領合符箱移入文華門東屋二十七日隨惇親王接駕於大橋東煦初在內繳合符箱訖詳留京辦事筆記翌日遞

全牌請

安是日奉

派驗看月官十月初三日五壻齊漸達五女茗夫婦率其子恕

官後命女湘雯平雯自邵來甯初五日奉

派閱鄉試覆試卷初十日

慈禧皇太后萬壽蟒服行禮二十日奉

派磨勘武鄉試卷冊翌日覆

命二十六日孫讓殤十一月十二日奉

派揀選贊善等缺是月奉

派驗看月官十二月初五日赴隆福寺

行宮

几筵前行初周年禮先期奉

派於月朔起程初八日抵京聯銜請

安初十一兩日戶部京察過堂同事爲載鶴峯榮仲華

祿

袁小

午保恆諡慶星階陞溫明叔葆自十六日起考試同文館

算學繙譯化學格物十八日畢自前歲補讀史訖即擬溫

經得十種左傳或選或全多寡不一爰以

欽定左傳讀本兩部為主於十種中各以五種用五色筆分別圈

之其一部則高梅亭嶧左傳鈔以紫林西仲雲古文析義

以藍馮天閑李左繡以墨金聖嘆人才子必讀書以硃張

崑崖光左傳評林以綠一部則儲同文欣七種古文選以

紫王或庵源文章練要以藍徐退庵與經史辨體以墨汪

敬堂基古文階鳳以硃孫月峯鏞鍾伯敬惺左傳文定以



緣資既驚鈍又苦無暇閱兩載僅畢此一書嗣是乃通溫  
各經注疏及說經諸書閒有摘錄

二年丙子七十歲

元旦朝服赴

慈甯宮

太和殿朝賀如儀二十六日聯銜謝京察照舊供職

恩二月十五日鄉試覆試奉

派貢院搜檢二十四日補鄉試覆試奉

派閱卷二十七日蒙

恩賞資

欽定平定粵匪方畧計四十二函四百二十二卷

欽定平定捻匪方畧計三十二函三百二十一卷翌日謝

恩并奉

派驗看月官三月初六日蒙

恩充會試正總裁桑伯儕

春榮官單作百儕時官刑部尙書

崇文山

綺字古琴三等承恩

公時官刑部右侍郎

黃煦荻

倬字恕皆時官禮部左侍郎

副焉取中宗室會章恩

桂二人陸殿鵬等三百三十九人詳春闈瑣記四月十四

日覆

命歸撰會試錄前序十五日繙譯會試赴貢院搜檢此差

派在文會試以前出闈後仍終其事是日復

派內閣驗放均於翌日覆

命十八日復赴貢院搜檢翌日覆

命二十五日奉

派內閣驗放訖旋赴午門外禮部朝房察看殿試卷標識均於

翌日覆

命二十八日朝考奉

派擬題  
恭擬夙夜惟寅  
論剛健中正疏  
仍驗看月官翌日奉

派閱朝考卷五月十六日奉

派閱考試試差卷二十八日三品以上考試試差奉

派擬題

恭擬地平天成論賦得遠浦鐘來水接雲得雲字

閏五月始放試差六月二十

六日蒙

恩賞賚

穆宗毅皇帝御製詩文全集是日謝

恩並驗放覆

命二十八日

萬壽乾清宮補褂行禮七月初三日恭上

慈安端裕康慶昭和莊敬皇太后

慈禧端佑康頤昭豫莊誠皇太后徽號先期奉

派恭捧

冊寶至是禮成蒙

賞賚如前旋奉

恩詔加一級初六日聯銜謝

恩並驗放覆

命十二日

慈安皇太后四旬萬壽叩祝如儀是月奉

派驗看月官八月初六日子莧前以二品

恩廕至是考試奉

硃筆內用旋以主事籤分兵部職方司兼武選司行走翌日具

摺率赴

乾清門叩謝

天恩二十五日宗室鄉試覆試奉

派擬題

恭擬仲尼之徒賦得行人  
人驄馬過橋嘶得橋字

九月初五日秋審上班翌日朝

審上班崇正義塾察課十九日奉

派閱鄉試覆試卷嘗與文文忠言外國使臣駐京者紛紛矣彼

知我情我未能知彼情我聽若言我無以測若虛實彼國  
聽若言我又無從剖我是非則以我無人焉在彼故是宜  
早爲之所惜使才難得經理洋務之使才尤不易得也相  
與咨嗟而罷已而復論此事愚以爲洋務謗藪也總署之  
事惟署中諒之卽署中猶或不盡諒之至治洋務於外國  
其勢當更難於總署將來使果得人總署不可不有以諒  
之庶繼起有人肯力任其難文忠以爲然至是郭筠仙嵩燾  
奉使英國於是月二十五日出都星使不遠十萬里往駐  
外國治所自此始乃文忠已於是年端陽前一日作古竟

不及見能勿泣然十月初十日

慈禧皇太后萬壽叩祝如儀二十六日大司空李蘭孫鴻藻總憲景

秋坪廉

派辦總理署事宜是月奉

派驗看月官十一月初三日奉

派覆勘同治十三年各省歲試前列並恩歲貢卷二十五日勘

竣覆

命時以倉庫未裕臣部綜覈度支公議條陳八事曰地丁宜求

復額漕糧宜籌全運鹽課宜改積習關稅宜期核實釐金



宜防侵蝕州縣宜嚴交代營伍宜亟整頓動用宜歸撙節  
於是月初十日奏上欽奉

俞允飭遵十一日隸書總理署西廳額曰宇宙太和聯曰麟鳳  
在郊笙鏞式序日星爲紀江漢安流又記嘗書同文館聯  
曰大學之道本彌六合我輩於此當惜分陰堂東亭曰茶  
半香初十二月初二日赴崇正義塾察課十一日子蓮以  
一品

恩廕考試奉

旨內用旋以員外郎仍籤分刑部派湖廣司翌日具摺率赴

乾清門叩謝

天恩自十六日起歲考同文館算學繙譯格物化學富國策並甄別十八日畢是日家媳趙氏經禮部題准

旌表貞孝後揚州府志甘泉縣志皆載之是年自春闈後讀知不足齋叢書三十函并手自摘錄訖

三年丁丑七十一歲

元旦蟒服赴

慈甯門

乾清門朝賀如儀二月十五日鄉試覆試奉

派搜檢二十三日各省鄉試補覆試奉

派擬題

恭擬宗族稱孝焉賦得春水絮吹魚得魚字

翌日奉

派閱卷三月朔恭詣隆福寺

行宮

几筵前行禮釋服先於月前奉

派二十七日起程至是禮成初四日聯銜覆

命初七日奉

上諭吏部尙書著董恂兼署

毛煦初入闈差缺

翌日赴貢院磚門搜檢

初九日謝

恩並覆

命先是磚門搜檢豫於月前奉

派至是及十一十四等日前往均於各次日覆

命二十五日宗室會試覆試奉

派擬題

恭擬亦有仁義而已矣賦  
得雲無心以出岫得心字

四月朔奉

派覆勘會試中卷初二日子甚以時疫辭世後壬午歲始由天

仙庵遣送歸葬新南塋十二日命以孫諧嗣冢男蓉承大

宗二十六日女茗亦以時疫故於東院不遠三千里來甯

竟以輓歸亦可哀已憶丙寅夏身染時疫幾殆當昏不知

人之頃得丁琴士比部一藥而汗汗時猶不知也今姊弟  
兩人百藥不效乃追感比部不置是月奉

派驗看月官二十九日奉

派閱朝考卷五月十五日奉

派考試漢廕生閱卷二十六日赴崇正義塾察課

題爲雖與之  
俱學賦得室

有蘭花不炷  
香得香字

六月初三日覆勘丙子科優生並補考選拔

試卷越日覆

命二十四日奉

派承修

都城隍廟工程二十六日叩祝

萬壽於

乾清宮奉

懿旨嗣後卽於此日行慶賀禮七月初六日孫謙生子蓮馬姬出

蓮請以嗣弟萇辛巳年以痘殤十二日

慈安皇太后萬壽朝服叩祝如儀十八日拔貢補考奉

派擬題

恭擬皆古聖人也賦得  
文古後垂名得名字

二十七日考試教習奉

派貢院搜檢八月二十日奉

派覆覈刑部秋審冊月杪奏上二十六日奉

派閱編檢考試御史卷九月初三日

召見後秋審上班赴崇正義塾察課仍赴總理署翌日朝審上

班二十四日武會試覆試奉

派赴正白旗侍衛教場閱看馬步箭弓刀石十月初五日

太和殿武傳臚朝賀如儀初十日

慈禧皇太后萬壽朝服叩祝如儀二十二日起同文館偕經筵諸

同事觀星是夕偶值火土金木四星平列如帶作觀星圖

說翌日晤桂蓮舫出匣中簽字十四請排其次字乃范劉

文清書而成者當爲排之乃琴餘相鶴風生竹書罷籠鶯

水滿溪句也十一月二十七日赴崇正義塾察課月杪覆  
勘歲試前列卷十二月十九日起考試同文館天文算學  
繙譯化學史畧二十二日畢是年讀粵雅堂叢書手自摘  
錄成兩函是年三月六日檢壁間護書得一舊稟論勇與  
兵異四端蓋爲議移外勇保衛

京師者發不記是何歲月矣大約在咸豐同治之間云兵制  
有事調發無事歸伍操縱自如行所無事勇則招募甚易  
遣散極難當其招之之時不盡有籍可考及其遣之之時  
又復無伍可歸散漫縱恣患不勝慮勇之所以與兵異者



一也用兵必先籌餉開源亦當節流馬步戰守兵有定額  
卽餉有定制乃自用勇以來或兩勇而食三兵之餉或一  
勇而食二兵之餉甚或兩勇而食五兵之餉勇之所以與  
兵異者二也兵有缺額餉不空發度支嚴核細及建曠若  
勇則本無定額一聽主者自報或報十而僅有七八或報  
十而僅有五六虛冒名糧之律竟無所用勇之所以與兵  
異者三也兵有定數冊載分明傷亡潰遁不能不報若勇  
則來不知其所自去不知其所往傷亡尙或請卹潰遁則  
無所施刑勇之所以與兵異者四也議者欲移各路營勇

保衛

京師并知勇不可常議及將來有缺不補夫有缺不補自是  
潛消默減之法而以之保衛

京師不過開銷勇糧較之屯紮外省其名近正耳不知勇之  
爲患業已彰明較著若置之

輦轂之下不幾以堂奧爲潛匿乎總之勇無確數可稽故上  
則不樂帶兵而樂帶勇勇之所領獨厚故下則願充勇而  
不願充兵後來前議漸息故此稿未完

四年戊寅七十二歲

元旦朝服赴

慈甯宮

太和殿朝賀如儀二月十四日沈經笙言一統志事謹按

大清一統志成於乾隆二十九年有

御製序冠其端恂舊於保陽得一部計四百二十四卷頃

內廷以園燬於火購之不獲謹以進

呈二十七日赴崇正義塾察課翌日考試孝廉方正奉

派擬題

恭擬百穀用成策  
君子終日乾乾疏

三月十六日齊漸達壻校對楚漕江

程畢攜其子女歸是月奉

派驗看月官四月二十四日孫誠生子蓮汪姬出時恭纂

穆宗毅皇帝實錄五月二十日奉

上諭著派董恂充

實錄館正總裁翌日謝

恩並驗放覆

命二十二日赴館時監修總裁爲寶珩相國同充正總裁者

爲沈經筵協揆靈薌生冢宰桂廣紹彭大司馬壽副總裁

六徐蔭軒桐殷譜經兆鏞彭味之久恩露圃承察鑑泉杭阿德

景融椿蔭軒充橐本總裁載鶴峯相國充蒙古總裁自是

時赴館不悉記二十四日起挑取同文館學生二十八日  
畢是日奉

派驗看月官六月二十六日

萬壽赴

乾清宮行禮花衣仍自二十五日起至七月朔時有議整頓圍  
法宜收買私錢以資鼓鑄者廣西司呈原奏請議覆手書  
一紙給之畧云私鑄必先私銷所銷者卽此官錢彼方苦  
銷無可銷我乃欲多發官錢以敵私鑄是謂添薪救火因  
私錢爲民害不辦私鑄而欲以官物收私錢是謂替賊銷

贓私銷不止則官錢隨發隨銷隨銷隨少是謂不塞漏卮  
私鑄不止則私錢愈收愈鑄愈鑄愈多是謂助其滋蔓私  
銷私鑄例應嚴拿慮其拒捕姑容不辦是謂因噎廢食今  
年不辦來年若何私錢則日盛一日私夥亦日強一日是  
謂養虺成蛇是月初四日奏上乃罷收買私錢之議然該  
司以鄙論太切直回堂定橐不能盡用也十二日

慈安皇太后萬壽朝服叩祝十九日戶部考送軍機章京八員

題爲

解愠阜  
財論後軍機覆試錄其六引

見記名者三王汝濟徐樹鈞顧璜二十三日王夔石

文  
詔

派辦總理署事宜本署周小棠家授順天府府尹在總署大臣

上行走九月十二日監試同文館投考學生本日題為漢立博士十有

四家論翌日題為十八日覆試題為陳蕃薦五處士論十月初十日

三不朽三不殆論

慈禧皇太后萬壽朝服叩祝十五日奉

派揀選副參游都各缺十一月奉

派驗看月官十二月初七初八兩日戶部京察過堂時同事為

景秋坪廉志藹雲和殷譜經兆麟芝龔書潘伯寅祖十六

日赴同文館歲考算學繙譯化學格物測算天文公法撮

要醫學十八日畢

五年己卯七十三歲

元旦朝服赴

慈甯宮

太和殿朝賀如儀翌日赴總署赴戶部初五日赴館二十六日

聯銜謝京察照舊供職

恩二月奉

派驗看月官三月初六日奉

上諭朕奉

慈安端裕康慶昭和莊敬皇太后



慈禧端佑康頤昭豫莊誠皇太后於本月二十一日啟鑾著派惇親王協辦大學士尙書全慶尙書董恂步軍統領榮祿留京辦事惇親王全慶董恂三人分日輪班在內值宿十七日奉上諭朕啟鑾後管理戶部三庫事務著派董恂長敘署理翌日

謝

恩二十日留京王大臣遞牌翌日

啟鑾跪送於東華門內橋東路南時惇親王赴神武門小汀協揆在文華門東屋守合符二十三等日輪班值宿仍赴館

恭閱

實錄閣本大內本暨

聖訓二十九日接

駕於大橋東翌日閏三月朔遞全牌

召見軍機惇親王董恂詳留京辦事筆記初二日

神牌升祔朝服跪接

黃輿於大清門外翌日

覃恩頒詔十三日赴

東陵開工請

訓二十二日回京跪

安四月朔集內閣議吳柳堂吏部可遺摺十六日奉

派閱考試試差卷二十六日起

乾清宮抖晾

實錄二十九日始畢二十七日三品以上考試試差正抖晾時奉

派赴南書房東屋擬題

恭擬輔相天地之宜論賦  
得葵花開向日得花字

五月朔抖晾

覆

命六月奏事處傳二十五六兩日

甯壽宮聽戲以病假未克到班七月初八日鑑園主人招總署

同人集有聲畫樓書樓外楹聯曰清風明月本無價近水

遙山俱有情十二日

慈安皇太后萬壽叩祝如儀是月奉

派驗看月官八月初八日赴貢院磚門搜檢先於月前奉

派至是及十一十四十七下月十七等日前往均於各次日覆

命初十日奉

派覆覈刑部秋審冊十九日奏上二十六日宗室鄉試覆試奉

派擬題

恭擬工師得大本賦得風竹玉相戛得風字

九月初五日赴崇正義塾察課

初八日奉

派覆勘順天鄉試卷十一日琉球遣臣前進貢正使耳目官毛

精長陳情都通事蔡大鼎陳情通事林世功來謁於總理署偕沈文定景秋坪見之初東洋兵之在臺灣也柬其駐京使臣曰自古知足不辱知止不殆中國之自守以此中國之待人以此中國之所望於友邦者亦以此鷸蚌之爭孰利螳螂之後伊誰所以中國遇事不爲己甚特未知貴國以爲何如耳恂嘗語文文忠東洋結西人以自固蓋畏俄見圖故公函以此諷之然亦實以俄若併倭更不若存倭之爲患較輕也旣而東洋勢日張適沈文定莅事復語文定曰古人之備蠶蠹不減虎狼朝鮮琉球均在東洋臥

榻之側東洋之進退疾徐視華俄之往來疏密不可不留  
意也文定諾之無何以伊犁事華俄偶有違言日本遂縣

琉球二十三日麟芝盒書崇受之福

派辦總署事宜翌日奉

派閱順天鄉試覆試卷是月奉

派驗看月官十月初十日

慈禧皇太后萬壽叩祝如儀二十四日

東陵專案開工請

訓十一月初三日回京跪

安二十四日恭進

實錄陳

保和殿翌日同上進書表陳

保和殿

皇上御太和殿受賀如儀

臣恂奉

旨賞加二級謝

恩前後蒙

賞鞍馬全副大蟒紗一匹大綵緞六匹紅綢裏七匹銀百兩二

十七日復聯銜謝

恩翌日奉

派驗看月官十二月初十日同起

召見四十五人內會議使俄事者四十一人其四人則董恂麟

書崇禮夏家鎬皆在總理署者十六日王大臣六部都堂

仍集總理署會議十二十七等日覆勘光緒三年各省歲

考前列試卷自十七日起歲考同文館天文算學繙譯洋

漢格物測算各國史畧化學醫學十九日畢二十日考試

同文館漢教習題為請學為國賦得準二十三日覆試題為

備花時要素詩得詩字大匠誨人必以規矩賦得計取十二人二十九日代奏

曉光未白句先成得先字



實錄館提調等官各謝

恩

六年庚辰七十四歲

元旦朝服赴

慈甯宮

太和殿朝賀如儀二十一日會議邊防摺使俄參贊片奏上二

月十三日女荔子歸蔚州牧王小秋

榮紱

子翰書二十一日

以

實錄告成

賜宴於禮部大堂翌日謝

恩二十三日己卯科各省補鄉試覆試奉

派擬題

恭擬里仁爲美賦得  
昨日山水遊得遊字翌日奉

派閱卷二十五日戶部奏籌備餉需亟宜覈實者十條曰墾荒

曰票本曰關稅曰釐金曰交代曰奏銷曰減廉曰減平曰

工程曰顏緞兩庫折價是月奉

派驗看月官三月二十日

皇上御乾清宮恭閱

實錄首函二十六日奉

派閱宗室會試覆試卷四月初四日先是

實錄館於前月杪奏派恭填

廟諱

御名

圈派寶盞靈桂董恂廣壽恩承徐桐潘祖蔭至是敬謹粘好皆

黃紙硃書三跪九叩禮畢監視包封翌日覆

命十七日奉

派閱會試覆試卷二十日

殿試讀卷

圈派董恂徐桐烏拉喜崇阿王文韶許應騤錫珍孫詒經桂昂  
計應試三百三十卷二十四日進呈前十卷

召見拆封爲黃思永曹詒孫譚鑫振戴彬元龐鴻書呂珮芬張  
星炳劉沛然黃紹箕朱福詵詳文緣瑣記翌日

太和殿傳臚朝賀如儀二十六日赴禮部

恩榮宴如儀二十八日奉

派朝考擬題

恭擬取財於地取法於天論耕藉  
田疏賦得芳郊花柳遍得芳字

旋赴

闕左門驗看月官翌日奉

派朝考閱卷六月十九日奉

派朝考優貢閱卷得士四十七人二十日奉

上諭戶部尙書董恂著毋庸在總理各國事務衙門行走欽此

當咸豐之季年

穆宗毅皇帝登極設有此署奉

派此差以來日須進署事有三數語可了者儻接晤無人或致數

日十數日不了方事之殷也有日再進署之時甚且有夜

不出署之時自桂文端師

同治元年六月二十一日

暨恆勤敏

五年十二月二

十五

譚端恪

九年四月初七日

崇勤恪

光緒元年九月初五日

文文忠

二年五月

初四

成竹坪

五年八月十二日

先後卒於位徐松龕亦告歸終於

家至是臣恂犬馬齒索蒙

恩垂閔五中感切莫可名言二十五日蟒服赴

甯壽宮聽戲翌日叩祝

萬壽於

乾清宮復赴

甯壽宮聽戲蒙

恩賞賚於坐次叩謝如儀七月十二日

慈安皇太后萬壽朝服赴

慈甯宮叩祝如儀二十八日赴館恭送

實錄於

皇史宬尊藏八月十八日

召見恭親王以次二十二日臣恂與焉二十日武舉覆試奉

派列字圍閱看馬步箭弓刀石越日覆

命九月朔奉

派閱孝廉方正卷初二日秋審上班翌日朝審上班初九日崇

正義塾察課二十一日女纂子歸駕部主政彭艾圃高柱子

詒孫二十七日戶部閱捐輸摺記捐生姓之不常見者十

二日問陡本縱適加可校拓丑怡遠十月朔

坤甯宮喫肉初三日戌刻聞戶部不戒於火馳赴署詢悉河南  
司當諭察看近庫門封標傳南城火會牌催知會各堂少  
頃右翼總兵麟芝盦來本部署左堂奎星齋來管庫大臣  
寶佩珩相國來右堂長彝亭敘來左翼總兵文錦如秀來  
右堂王夔石來亥刻撲滅計燬司堂科房共十三間據地  
面報係酉刻起火照敘入摺並請處分子正畫奏稟訖俟  
滅餘火乃歸右堂宜春雨振續來未及晤少頃奏上初五  
日武傳臚

升殿朝賀如儀初十日



慈禧皇太后萬壽叩祝如儀十一月二十五日戶部奏事自

朝回轎杆脫肩振傷腰脅請假續假歷四十餘日始愈恂殄殲  
牀褥沈文定再臨晤存乃歲方及除而文定凶問至嘗論  
文文忠盡瘁事國能養重以崇國體遇有事須稍自貶損  
國難始紓者恂輒任之文定則不忍以謗獨遺之恂二公  
同一盡瘁而文忠之忠人知之文定之忠或不盡知之故  
恂之慟文定較慟文忠爲尤切

七年辛巳七十五歲

正月十三日銷假具摺恭請兩宮

皇太后聖安

皇上聖躬萬安十五日與上元宴十六日與廷臣宴叩謝

賞賚如儀是月奉

派驗看月官二十朔

坤甯宮喫肉翌日赴

東陵收工請

訓初十日回京跪

安二十九日考試孝廉方正奉

派擬題

恭擬宅心知訓  
策著誠去偽疏

三月初十日戌刻

大行慈安端裕康慶昭和莊敬皇太后慈馭上賓翌日奉文自是

縞素日赴

慈甯宮三齊集十五日聯銜具奏籲懇

皇上節哀二十日

梓宮奉移漢大臣官員在景山後東北角齊集候

靈駕至舉哀跪迎隨行俟奉安

觀德殿畢於門外隨班行禮自是縞素日再齊集二十一日會

議奏上奉

上諭恭上

尊諡稱曰

孝貞慈安裕慶和敬儀天祚聖顯皇后普祥峪萬年吉地定爲

普祥峪

慕東陵四月初七日朝奠後釋綯素每滿月皆羽纓涼帽青長袍

祔行禮自斂奠至初祭釋祭大祭臣恂皆與是月奉

派驗看月官五月十三日赴

觀德殿上

尊諡禮成嗣後章奏文移敬謹書寫

孝貞顯皇后六月十四日戶部豫籌伊犁償款會同總理各國事

務衙門具奏以竟代守伊犁之局十九日赴

觀德殿行百日祭禮歸始獲髮二十五日

坤甯宮喫肉釋青袍後始祭神謂之開神特著花衣翌日

萬壽補褂行禮聯銜具摺恭請

慈禧皇太后聖安是月奉

派驗看月官七月十二日

孝貞顯皇后誕辰赴

觀德殿行禮十五日中元節齊集行禮閏七月初十日行閏滿

月禮二十八日崇正義塾察課二十九日先經奉

派覆覈刑部秋審冊是日奏上八月初二日秋審上班翌日朝

審上班二十八日奉

派驗看月官翌日奉

派閱孝廉方正試卷九月初二日朝鮮恭進香貢齊集

觀德殿行禮初四日豫行六滿月禮初七日行祖殿禮初九日

出東直門跪送

孝貞顯皇后梓宮於大橋東二十二日赴大清門外朝服跪接

孝貞顯皇后神牌升祔禮成十月朔

坤甯宮喫肉初六日奉

派閱編檢考試御史卷初十日

慈禧皇太后萬壽蟒服叩祝如儀是月奉

派驗看月官十一月二十日集鑑園十二月初二日戶部京察

過堂翌日畢同事爲景秋坪奎星齋

潤時署崑曉峯岡學差缺

王夔石

崇受之

禮

邵沐生

亨豫時署孫子授詒經學差缺

戶部以新疆局勢大定

是月十五日奏請

飭裁營勇力籌善後以期經久得

旨俞允飭遵金將軍順以伊犁接收在即請催提各省關銀兩

以濟急需二十七日速議奏上奉

旨照准記讀粵雅堂叢書後得通鑑補讀之擬以涑水原書用  
硃圈句讀而嚴氏所補則用藍圈自奉

實錄館差此業遂停幸前差告竣總署免差復理故業並手自摘  
錄分裝四函

八年壬午七十六歲

元旦蟒服赴

慈甯宮

乾清宮朝賀如儀翌日

坤甯宮喫肉初四日戶部奏事復赴部十三日戶部奏事二十



日赴部翌日開篆赴部二十二日部署晤秋坪言奉教書篆文區須反正成字顛倒成文蓋用文章北宋黃山谷高尚中唐白樂天體而又加以迴文以便鏡中對照也囑爲代撰因擬八字曰幽琴古墨素竹崇蘭翌日戶部奏事在內復擬八字曰高山日白小雨天青是月京察本於二十四日奉

上諭戶部尙書董恂年力就衰著開缺越日入內遞摺謝

恩臣恂謹按備豫不虞金粟爲重計去位之日內庫實存銀一百一十萬兩有奇部庫實存銀七百三十六萬兩有奇京

通各倉實存糧三百四萬石有奇款目細數詳見權衡金  
粟筆記追憶

穆宗毅皇帝登極之年戶部庫存銀七萬餘兩至今猶惴惴焉謝  
客事訖時已三月初旬蓋不作大字經年矣乃磨墨清釐  
宿逋首書瓜洲鍾公祠聯云許國以身慷慨孤忠輕七尺  
褻庸有典敬恭明祀仰千秋又有囑書戲臺聯者爲書句  
云乾坤大戲場看一霎風雲雷雨古今幾腳色祇兩途舜  
蹠人禽餘不悉記十數日來手腕欲脫二十二十一兩日  
崇正義塾察課二十四日閱課卷夏作譚友夏刻水經注

批點跋趙東潛水經注釋跋戴東原刊水經注跋又補書錄酈善長水經原序闕文於趙誠夫水經注釋後是年秋雲南報銷案出事在恂卸事後閭丹初尙書未到任以前伏讀邸抄七月二十三等日歷奉

上諭竊惟

臣

恂卸事甫經數月計該司承辦此案自必多有舊

人何以一旦踰閑至此深愧前在任時教誡不豫未能積誠相感以收格心之效每一念及無任悚惶九月二十二三兩日崇正義塾察課二十五日閱課卷是年讀困學紀聞日知錄峒嶺雜著易話易廣記北湖小志七修類稿金

壺七墨野記擘經室集詁經精舍文集曾子注釋雕菰集  
恆言錄呂東萊文集人譜類記廣陵詩事定香亭筆談小  
滄浪筆談疇人傳呻吟語閒談消夏錄小豆棚鋤經書舍  
零墨讀書記疑獨悟菴叢抄情史重訂西青散記印雪軒  
隨筆訂譌雜錄鏡華水月稗海唐人說薈水經注釋一家  
言退菴隨筆南省公餘錄古格言凡三十八種手摘錄成  
十四帙每帙各題其首曰還讀我書室隨手記仍各標其  
書名以上皆本年壬午日課作於從容暇豫之時又上年  
辛巳公餘零星攢集得五帙其書爲池北偶談皇華紀聞

居易錄香祖筆記蜀道驛程記秦蜀驛程後記隴蜀餘聞  
分甘餘話兩般秋雨庵隨筆國史補涉史隨筆續夷堅志  
硯北雜志古今藥石海嶽志林耐冷譚曉讀書齋錄并集  
霜紅龕集薑露菴雜記硯桂緒錄海天琴思錄續錄蕉軒  
隨錄蘿摩亭札記夢園叢說南溟梔語讀書雜釋吹網錄  
鷗陂漁話射鷹樓詩話凡二十九種亦題其首曰還讀我  
書室隨手記蓋上年自錄通鑑補旣竣讀之於輿中枕上  
錄之於散朝以後赴部以前者也先是總理署治公牘所  
後院有古桑蔭畝復補植穉杏一恂因隸其額曰綠肥紅

瘦之軒治公於此卽讀書於此故凡有記載卽題其所記  
帙首曰綠肥紅瘦之軒隨手記比總署卻差則記事於私  
室曰還讀我書室

九年癸未七十七歲

元旦辰初興蟒服拜

闕禮

神祀 先手訂年譜二月朔初稟成譜所記至壬午正

月餘俟隨時續記三月朔手錄清稟發繕二十五六兩日

崇正義塾察課二十八日閱課卷

題爲及其使人也器之  
君子義以爲上暖風晴

日有詩無  
得無字

四月朔校勘路本國策計二十七簽是本得之

閩丹初尚書仍致丹初商訂發繕五月二十日巳刻孫謹  
生蓮兒楊姬出是月雲南報銷案結伏讀邸抄二十九日  
奉

上諭前據御史陳啟泰奏叅太常寺卿周瑞清包攬雲南報銷  
該省糧道崔尊彝永昌府知府潘英章來京賄託復據御史  
洪良品給事中鄧承修奏以此案牽涉景廉王文韶先後降  
旨派惇親王閩敬銘潘祖蔭張之萬麟書翁同龢薛允升會  
同查辦茲據惇親王等奏查明收受津貼及說事過錢各官  
吏完繳贓款仍分別從重定擬請將失察之戶部堂官及工

部堂司各官雲南督撫交部分別議處各摺片并將款目開單呈覽此案崔尊彝承辦雲南報銷潘英章輒爲代託周瑞清轉囑龍繼棟向孫家穆說明津貼公費銀八萬兩司員書吏得受銀數多寡不等雖經該部覆核所報均係應銷之款惟輾轉賄託數至盈千屢萬官吏通同朋分入己情節較重自應從重懲辦已革戶部主事孫家穆以主橐司員得銀七千兩之多實屬貪婪不職已革太常寺卿周瑞清雖無包攬報銷及分贓情事惟以三品大員輒商同說合過付銀兩實屬荒謬孫家穆周瑞清均著發往黑龍江效力贖罪周瑞清



據供母老丁單著不准留養已革戶部員外郎福趾於賄辦報銷先不知情事後分用銀四千兩已革知府潘英章聽從賄託明知崔尊彝侵用公款輒向借銀一千七百餘兩已革戶部主事龍繼棟聽從周瑞清說合過付并得受酬謝銀二百兩已革御史李郁華雖未同辦報銷惟身任風憲官輒向各處探問報銷諸事致人疑畏又甘爲潘英章代買物件因得餘賸銀四百兩福趾潘英章龍繼棟李郁華均著發往軍臺效力贖罪降調戶部主事崔澄寰周頌向孫家穆借用銀兩現已歸還惟究係報銷之款崔澄寰周頌均著卽行革職

得贓之書吏褚世亨張瀛吳發林張兆鴻均著杖一百流三千里已故雲南糧道崔尊彝侵用公款二萬三千二百餘兩雖已病故仍著革職著落該故員家屬完繳至此案牽涉景廉王文韶一節現經訊明潘英章周瑞清及戶部司員書吏均稱實無關說饋送及分用此款情事詳核號商帳簿亦無潘英章等饋送之款惟現在軍務已平該省軍需報銷與年例報銷仍前併案辦理該尙書等未經查出實屬疎忽且於司員孫家穆等併保列一等之員外郎福趾得贓均無覺察亦難辭咎景廉王文韶及戶部堂官并失察書吏受贓之工

部堂司各官均著查取職名交部分別議處崔尊彝挪移官  
項至十萬餘兩之多該督撫毫無查考復將該革員保列卓  
異崔尊彝潘英章賄辦報銷事先未能覺察發覺後又未將  
挪用銀兩查明實數具奏均屬咎有應得劉長佑岑毓英杜  
瑞聯均著交部分別照例議處餘依議欽此六月二十二日

奉

上諭前因雲南報銷一案司員書吏收受津貼銀兩情節較重  
降旨將失察之戶部堂官及工部堂司各官雲南督撫交部  
分別議處茲據吏部等衙門奏遵議處分一摺該堂官等或

濫保劣員或失於覺察均有應得之咎戶部尙書景廉前戶部左侍郎王文韶調任吏部左侍郎前署戶部左侍郎奎潤及前任戶部尙書董恂將已革員外郎福趾京察保列一等均著照部議降二級調用不准抵銷景廉著仍在軍機大臣總理各國事務衙門大臣上行走前任雲貴總督劉長佑雲南巡撫杜瑞聯任聽屬員挪用公項均著照部議降三級調用不准抵銷該督撫於崔尊彝保列卓異應得降二級調用公罪處分景廉王文韶奎潤前署戶部左侍郎吏部右侍郎許應騤前戶部右侍郎通政使司通政使崇禮應得罰俸降

級留任及工部尙書翁同龢前工部左侍郎調任兵部右侍郎師曾前工部右侍郎調任戶部右侍郎孫家鼐前署工部右侍郎現署左侍郎徐用儀工部郎中福志蔡世傑應得罰俸岑毓英杜瑞聯應得降級留任各處分均准其抵銷欽此

臣  
恂愧無知人之哲未能防範將來遂致卸事未久遽有司員得受津貼銀兩之案案中且有京察保列一等之員撫衷循省寢饋難安乃荷

天恩不加嚴譴僅鑄二級感激之餘益深祇懼九月二十五六兩日崇正義塾察課二十八日閱課卷

題爲稱其德也且知方也猶有黃花

晚節香  
得香字

是年燈節鼻淵證愈距腰脇振傷於次年辛巳正月十三日銷假時起晝夜涕流至是始止計厯二年連閏二十五閱月是年讀老子列子莊子手錄成五帙并摘錄聖歎外書一帙隨園全集十二帙又以其餘閒臥讀見聞隨筆對山書屋墨餘錄六合內外瑣言柳南隨筆夜雨秋燈錄續錄藝林伐山亦復如是澆愁集史餘萃覽勝國文徵常談叢錄庭聞錄耳食錄讀史探驪錄笑笑錄醒睡錄鸚鵡軒質言茶餘談薈聞見異辭諸書腰痛不支未之錄也是年男蓮奉到光緒七年五月十四日九月二十三日

兩次

覃恩誥軸以刑部員外郎

誥贈嗣父桂奉直大夫如蓮官蓮

誥授奉直大夫妻萬氏

誥贈宜人并再

馳封本生庶母曾氏宜人

十年甲申七十八歲

元旦辰初興蟒服拜

闕禮 神祀 先禮成開辦莊列作莊列辨似序云嘗讀莊子

列子其辭義相似者往往誤記或以莊爲列或以列爲莊  
臨文輒費檢尋爰采而彙錄之顏其首曰莊列辨似而莊  
與莊列與列各有辭義相似者又或誤記篇名或記其一  
忘其一因并附錄焉以風燭之年而勤記問之學攤紙濡  
毫時復自笑或解之曰遺贈後人計亦良得然而英髦宿  
慧過目不忘正無需此飭飭爲也三月中手繕稟訖與上  
年所錄老列莊爲一函二十五六兩日崇正義塾察學二  
十八日閱課卷

題爲齊桓公正而不譎仁者  
愛人緣語篤邊柳得鶯字

比年以來法

人奪我越南襲我馬尾毀我戰艦犯我臺灣前此所未有



也恭讀七月初六日邸鈔欽奉

上諭聲其罪而責之九月十六七兩日崇正義塾察學之期腰

痛不克往緘題寄去二十日閱課卷

題爲民之不能忘也  
先行其言晚節漸於

詩律細  
得詩字十月初十日

慈禧端佑康頤昭豫莊誠皇太后五旬萬壽望

闕叩祝日來閱字林滬報載前使英國參贊大臣劉雲生參議

錫鴻請止鐵道疏爰書其後云恂謹案中國造鐵路各國之

欲之不啻晉人欲齊之封內盡東其畝也若因法國之覺  
迫中國以不得不從是法國之力能使中國受損而卽以

中國所受之損結歡於各國各國之德法國也必深此事  
果行將來各國又未知何時乘隙思有所取於中國以酬  
法國恐中國之憂未有艾也賓媚人之對晉人也曰唯吾  
子戎車是利無顧土宜憂國者誠不忘夫思患豫防乎盍  
三復之參議此疏稽其年月日滬報云光緒七年正月十六日在恂總署  
免差之後恂未獲見今始於滬報中讀之竊謂賓媚人之  
辭婉而勁參議之疏覈而摯均可稱不朽之文臘八日讀  
桃花扇其中事實有關乎當時國勢可以補史乘之遺足  
爲殷鑒者亦至文也歲晚務閒閱曬書堂所紀米太僕事

作米太僕遺石記是年補錄上年臥讀見聞隨筆諸書十  
九種成三帙并摘錄本年所閱雙槐歲鈔廣州人物傳春  
秋別典疑曜崔清獻公言行錄昭代經濟言正學續史見  
迂言百則重訂三家詩拾遺五山志林袁督師事蹟毛詩  
識小春秋詩話蠡勺編麗藻錄窺豹集嘯亭雜錄續錄  
語新粵屑覺來笑史航海述奇淞南夢影錄野叟曝言京  
報滬報申報計二十七種成十帙又續摘祝京兆野記亦  
錄廁其間

十一年乙酉七十九歲

元旦辰初興蟒服拜

闕禮

神祀

先禮成讀曬書堂諸書人日作補郝蘭皋證俗

文目錄序十四日通家閔少窗農部荷生來問滇司事宜  
以余初分部卽分是司也余告以司職銅漕而漕事尤曠  
宜先明各科房部分如蘇松湖南湖北三糧道事歸北漕  
科江西江安兩糧道事歸南漕科河南山東浙江三糧道  
事歸支科當時苦其難記乃爲歌曰松廣北西安南豫東  
浙江支科三自是呼吏遂無舛誤漕項款目更極繁瑣如  
江蘇謂之漕贈銀浙江謂之漕截銀河南山東謂之潤耗

銀江西湖南湖北謂之貼運銀又爲歌曰江漕贈浙漕截  
豫東潤耗江廣貼自是同堂遂無舛誤他皆稱是蓋官廨  
工夫當無異窗下不可視爲傳舍也二月二十八日恭閱  
邸抄以中法現議修好欽奉

諭旨著各路軍營定期停戰滇粵各軍定期撤回邊境三月十

八日赴崇正義塾察課二十一日閱卷

題爲忠告而善道之無倦窗前早月

當琴榻  
得前字

六月二十四日邸鈔以和局既定欽奉通

諭中外之

旨九月十六日緘察課題寄崇正義塾

題爲君子周急不繼富  
仁者必有勇昨夜一枝

開得二十日閱義塾卷畢作甲乙表是年摘錄棣叟閑評  
開字  
曬書堂文集筆記筆錄證俗文桐陰清話在園雜志餘墨  
偶談妙香室叢話文海披沙滬報申報邸報成五帙讀唐  
詩別裁唐詩紀事全唐詩宋詩別裁宋詩紀事宋詩鈔金  
詩選元詩別裁元詩選明詩別裁明詩綜

國朝詩別裁

國朝正雅集讀益智圖作詩情畫意冊並爲之序又錄朱竹垞  
靜志居詩話成八帙共十三帙歸一函

十二年丙戌八十歲

元旦辰初與蟒服拜

闕禮

神祀 先禮成讀易自是以此爲日課讀偶倦輯璫底

零箋以解之比零箋付梓讀偶倦則揜卷瞑坐旋復開讀

以爲常所讀或摘錄或全錄摘錄居多三月二十七日緘

察課題寄崇正義塾

題爲不怨勝己者忠焉能勿誨乎瓦甌篷底獨斟時得甌字

三十

日閱義塾卷畢作甲乙表七月二十四日接長聳談吉雲

函稱豫祝爲寄粵雅堂續集海山仙館叢書來八月初四

日爲孫諧娶運同銜靜海令胡畬亭明府

諱桂芬

孫女九月

十三日緘察課題寄崇正義塾

題爲似不能言者而敏於行菊留秋色蟹螯肥得秋

字

十七日閱卷畢作甲乙表十一月朔撰問圍遺稟序得

無訖齋試帖序

是年日以讀易爲事雖粵東寄到新書未遑讀也兩序蓋勉應之

恂嘗聞

先哲有言人之將終輒以生平所作往來胸臆竊以爲直至此時始有警省意毋乃太晚必欲如趙清獻每夕露香告天又未免過瀆是以中年以後每於歲杪通檢一歲所作是非及閱歲又覺前以爲非者誠非前以爲是者又不盡是也甚矣欲寡其過固未易言也上年乙酉除夕家宴旣訖默檢如前自念性愛讀書髫髻已然時苦書不易借服官以來漸有書矣誼應先公後私讀書究屬私事歲壬



午獲賦遂初可以還讀我書矣奈何汎濫無歸不衷一是  
夫博覽莫如溫經溫經莫先於讀易易固寡過之書也於  
是自本年丙戌元日起遵奉

御纂周易折中

御纂周易述義爲宗旁及連山歸藏蔡景君易說干令升周易注

莊氏周易義名侯行果周易注崔氏憬周易探元以上七種見馬

竹吾玉函劉氏牧易數鉤隱圖遺論張子載橫渠易說王  
山房佚書

氏湜同州易學張氏浚紫巖易傳李氏衡周易義海撮要

沈氏該周易小傳朱氏震漢上易傳漢上易卦圖漢上易

叢說胡氏方平易學啟蒙通釋吳氏沆易璇璣項氏安世  
周易玩辭趙氏彥肅復齋易說呂氏祖謙古周易王氏宗  
傳童溪易傳鄭氏汝諧東谷易翼傳林氏至易裨傳吳氏  
仁傑易圖說朱氏元昇三易備遺李氏心傳丙子學易編  
稅氏與權易學啟蒙小傳古經傳朱氏鑑文公易說趙氏  
汝楫周易輯聞董氏楷周易傳義附錄俞氏琰周易集說  
王氏申子大易緝說李氏簡學易記許氏衡讀易私言胡  
氏一桂易本義附錄纂疏易學啟蒙翼傳胡氏炳文周易  
本義通釋吳氏澄易纂言熊氏良輔周易本義集成董氏

真卿周易會通梁氏寅周易參義納蘭成德合訂刪補大

易集義粹言

以上三十七種  
見通志堂經解

四十四種且讀且錄厚幾及

尺分兩函比歲除默檢如前覺怨艾起伏者仍多耿耿也

甚矣欲寡其過固未易言也來日天曉生八十有一年矣

日兮月兮寢以馳補我過兮須何時

十三年丁亥八十一歲

元旦辰初興蟒服拜

闕禮

神祀

先禮成接讀學海堂

皇清經解說易諸書

通志堂經解說易諸書及玉函山房所輯  
諸說易佚書均於上年粗讀畢今接讀此

十五日恭值舉行

皇上親政典禮

臣

恂敬謹望

闕叩賀如儀昨讀焦里堂孝廉周易補疏越日手錄訖書其後  
云恂按輔嗣說易論者或揚之或抑之起輔嗣而質之使  
聞抑之之言而匿笑聞揚之之言而益匿笑不足以論輔  
嗣矣里堂先生撰羣經補疏而易居其一固不從輔嗣起  
見也乃於周易補疏序中述王氏之家學淵源遠溯至五  
世以上所撰補疏竟以王說爲綱就其逐條所說之得失  
各如其分一一疏通而證明之卒乃惜其天不假年秀而

不實一似周易補疏之作實因輔嗣者然嗚呼士得一知  
己可以不恨輔嗣有知將始而色變繼而心折終且感激  
涕零焉先生著周易章句圖畧通釋三書無間寒暑者垂  
二十年今又見其憐才之盛心若此窮而在下不忘先聖  
庶惡必察之訓使達而在上將牛溲馬勃胥歸藥籠不且  
肫肫乎夾帶人才有山公啟事之風歟恂讀易至此摘序  
中所稱各條錄之欲便檢尋卽以序中所列各條之次爲  
次二十五日冢孫諧以疫亡年甫十七憶冢男蓉於道光  
癸卯以毀亡年亦十七卽其嗣父也四月十一日臧察課

題寄崇正義塾

題爲又尙論古之人從吾所好點易露痕香得香字

旋閱卷畢作甲

乙表秋七月銘鼎臣索題養年別墅圖爲隸二十八字於

卷端云三十年前新翰苑三千里外故將軍野老殷殷詢

往事掀髯笑指西山雲九月十七日孫女壽哥生子蓮楊

姬出十八日緘察課題寄崇正義塾

題爲莫如爲仁故能樂也一川秋色稻花

風得秋字

旋閱卷畢作甲乙表十月朔跋查如江治中聖門諸

賢輯傳是年讀學海堂經解易其目爲顧處士炎武日知

錄臧茂才琳經義雜記江歲貢永羣經補義全庶常祖望

經史答問沈徵君彤果堂集廬學士文弢鍾山札記錢宮

詹大昕十駕齋養新錄潛研堂文集孫侍御志祖讀書脞  
錄戴吉士震東原集段大令玉裁經韻樓集孔檢討廣森  
經學卮言錢進士塘旣亭述古錄孫觀察星衍問字堂集  
汪拔貢中經義知新記李進士惇羣經識小武進士億經  
讀考異阮宮保擘經室集臧明經庸拜經日記梁孝廉玉  
繩管記王尙書引之經義述聞陳編修壽祺左海經辨趙  
徵君坦寶甌齋札記劉典簿履恂秋槎雜記崔茂才應榴  
吾亦廬稟朱武曹彬經傳攷證阮部郎福繫辭說洪州倅  
頤煊讀書叢說阮宮保訂詁經精舍文集學海堂文集上

三十種原書或不止解經通志堂第載其解經者通志堂經解不止說易恂第手錄其說易者

毛檢討奇

齡仲氏易惠學士士奇易說惠徵君棟周易述江上舍藩

周易述補焦孝廉循周易補疏易圖畧易通釋易章句張

編修惠言周易虞氏義周易虞氏消息虞氏易禮周易鄭

氏義周易荀氏九家義易義別錄

以上十四種皆全說易

共四十四

種所錄視上年稍厚亦酌分兩函並以其餘閒傍涉說文

解字歲將除如前默檢似本年悔吝較少有頃忽悟瞿然

曰嘻誤矣誤矣譬如早年不慊意之作今閱之乃轉而得

意此豈學與識之隨年而進乎實學與識之因衰而退也



欲寡過而不自覺其未能是卽叢過之階敢弗兢兢焉遵  
奉文言因其時而惕

十四年戊子八十二歲

元旦辰初興蟒服拜

闕禮 神祀 先禮成仍讀易遵照

欽定四庫全書總目逐細蒐羅其晚出之書未經著錄者亦均隨  
到隨讀或全錄或摘錄焉蒐羅未到則以其閒兼治說文  
解字並增訂荻芬書屋文彙蓋腰痛不支不出戶庭已兩  
更新歲又以臀无膚不能久坐於是不免有臥讀時上元

日讀胡氏易圖明辨書後中和節讀俞氏元亨利貞辨書

後三月朔讀丁氏周易述傳訟卦淺說書後二十一日緘

察課題寄崇正義塾

題爲我無是也人之生也直半開猶蕊花情遠得情字

旋閱卷

畢作甲乙表四月朔讀汪氏消夏錄中周易紀字書後既

望作登刁氏雜卦補注雜卦圖於易酌卷首說天中節手

錄易酌序卦雜卦兩傳注書後季夏六月作帷圍說七月

朔讀陳氏知非齋易注爲之序並書易注原書後序後中

秋日作歌唐集句圖贊并序應教越七日撰竹西分社

聯九月十七日緘察課題寄崇正義塾

題爲季康子問使民敬忠以勸如之

何仁者靜流水旋閱卷畢作甲乙表十月既望讀增知囊  
如有意得流字

補書黃蓋况鍾條後仲冬月朔書浩歌子螢窗異草崔十  
三篇後是年恭錄

御纂周易折中

御案計四帙並摘錄自漢迄今說易諸家三十有一種其目曰漢京

君明房易傳焦贛延壽易林漢書焦延壽字贛京房治易事焦延壽魏王輔

嗣弼易畧例共一帙宋蔡節齋淵易象意言祁子和雍傳家

易說共一帙明來矣鮮知德周易集注黎美周遂球周易爻

物當名共一帙

國朝刁蒙吉包易酌

帙一

馮世則經周易畧解

帙二

胡肫明渭易

圖明辨俞甯世長城元亨利貞辨陰陽大小辨誠通誠復

說

帙共一

蘇均甫秉國周易通義

帙一

胡大靈方周易本義注

蔡伯澄紹江周易本義補說

帙共一

趙隨軒敬襄序卦圖說

周易筭闕汪葵田汲周易紀字梁小若欽辰易說醒豁

帙共一

帙

丁儉卿晏周易述傳訟卦淺說

帙共一

俞蔭甫樾易貫周

易平議良宦易說湖樓筆談易玩易篇易窮通變化論周

易互體徵

帙共三

陳伯雙懋侯知非齋易注知非齋易釋

帙共一

帙

又易緯八種曰乾坤鑿度乾鑿度稽覽圖辨終備通卦

驗乾元序制記是類謀坤靈圖其一通計十有九帙亦酌

分兩函歲將除如前省檢覺學不加進而力則益衰又以  
所蒐羅者未能應手不免乘閒襍覽省檢之下頗愧李空  
同毋讀唐以後書之說且深懼無以對明道先生

十五年己丑八十三歲

元旦辰初興蟒服拜

闕禮 神祀 先禮成仍讀易昨於歲除前偶檢舊篋得嘉興

錢新梧儀吉所輯經苑一書皆補徐氏通志堂經解所未  
刻中有說易者五種今日遂取讀之仍分別摘錄全錄焉

二月初三日恭逢

皇太后歸政

皇上親政

臣恂卯初興敬謹望

闕叩賀如儀三月二十四日緘察課題寄崇正義塾

題為君子也棘子成

章君子也先進章傍花隨柳過前川得川字

旋閱卷畢作甲乙表七月朔作大

有一卦爻中非無卦名說八月既望作人不可以地限說

九月二十日緘察課題寄崇正義塾

題為偃之言是也雍之言然菊留秋色蟹

螯肥得肥字

旋閱卷畢作甲乙表十月望作以巽木入乎坎水

之下說十一月初三日適彭門第十女蒸故歲將除覈計

是年讀經苑五種其目曰宋司馬君實溫公易說一張知

常吳國易解四帙楊廷秀誠齋易說十帙徐總幹易傳二元

黃楚望易學濫觴一帙旋錄宋王伯厚說易一百八十條二帙

按王氏說易見困學紀聞卷一困學紀聞歲壬午曾讀一過惟前則散摘雜文今則全繕易說明洪守

美在中易說醒十一帙

國朝郝懿行蘭皋易說六帙又太倉陸伯葵寶忠沅湘攬秀集

元和陸鳳石潤庠山左校士錄南海譚叔裕宗浚蜀秀集

定遠方子嚴濬師蕉軒隨錄六合徐彝舟葉未灰齋讀書

雜釋歸安錢楞仙振倫安定書院小課刊本儀徵晏彤甫

端書梅花書院小課刊本侯官林惠常昌彝硯桂緒錄皆  
近人作也採其說易者錄之共一帙統計三十八帙厚幾及  
尺酌分兩函除夕省檢是年三百五十五日手實未嘗釋  
卷學仍不見進益可若何

十六年庚寅八十四歲

元旦辰初興蟒服拜

闕禮 神祀 先禮成時購

皇清經解續編未至乃搜說易諸家之零縑斷簡而讀之並以  
其暇手繕周易卦爻總論成帙及纂周易卦爻輯覽一書



閏二月二十日緘察課題寄崇正義塾

題爲樂則韶舞放  
鄭聲禮之用和爲

貴曉光未白句  
先成得成字

旋閱卷畢作甲乙表入夏以來手錄楊椒

山家訓並作俺答論六月望作清風樓詩存跋是月二十

六日恭逢

皇上二旬萬壽行慶賀禮

臣

恂卯初興蟒服望

闕敬謹叩祝如儀七月既望接良鄉令范履福函言五月杪山

水突發衝沒縣署百無一存八月初五日戌刻旌表貞孝

豕媳趙淑人故享年六十有四爲製扁聯輓焉扁曰

恩綸永戴聯曰貞之大義本平易孝則先師著以經九月十三

日緘察課題寄崇正義塾

題爲五十以學易力行近  
乎仁窗戶暖可喜得堂字旋閱

卷畢作甲乙表歲將除總計是年讀唐魏徵等羣書治要

一宋周行己浮沚集經解一明陳衍槎上老舌鄭胄師仲

夔冷賞

一萬章甫衣讀經劄記摘錄

國朝章次柯耒春秋內外傳筮辭考證一全紹裔祖望讀易

別錄一王子中懋竝白田草堂讀書記疑二汪容甫中述

學錢岳原唐澥亭述古錄汪漢郊家禧東里生燼餘集劉

炳藜希白三冬識餘戴和甫燮元瑞芝山房文抄華亭蔡

閒漁景真笠夫雜錄共一長洲彭詠莪蘊章歸樸龕叢書

老學菴讀書記湘鄉曾滌生國藩求闕齋日記摘錄其惠一帙

定宇棟感應篇贅言楊鳳山際春重訂感應篇經史摘典

養正評註摘錄其一帙統為一函如前默檢覺此中耿耿歉仄

殊多於以嘆伯玉之使誠善道其主胸臆而過之真不易

言寡也

十七年辛卯八十五歲

元旦辰初興蟒服拜

闕禮 神祀 先禮成開讀

皇清經解續編是編書二百九種千四百三十卷著書者百有

十一人而極力蒐羅集貲刊印追蹤太傅阮文達公原編  
於光緒十四年奏報告成則出國子監祭酒江蘇學政王  
逸梧先謙大宗師手上年冬杪男蓮奉到光緒十五年三  
月十六日

覃恩誥軸以刑部員外郎加四級

貤封本生庶母曾氏恭人並奉到光緒十六年三月二十二日  
覃恩誥軸以刑部員外郎加四級

貤封胞兄蓉中憲大夫嫂趙氏恭人本年三月十日閱登雲社  
課卷甫畢十七日緘察課題寄崇正義塾  
題爲子曰不在其位不謀其政

曾子曰君子思不出其位又題己所不欲勿施於人漏聲遙在百花中得遙字旋閱卷畢作甲乙表四月十一日寅刻讀我書樓災憶此樓落成時語樓主人曰人各有我我爲讀書之我我必有我不可不讀之書我不讀我書我負此樓我讀我書我非媚此樓也今樓則已矣我書我終不可不讀我讀我書何必樓十月初七日酉刻出嗣男蓮病歿時年四十有七遺兩子長者名誠幼者名謹長者歸老長房將來無論長者幼者所生之子仍先歸長房承大宗十一月二十日以曾姬任勞任怨效力有年三荷

覃恩

貤封公請升正位號以爲於禮宜從之

十八年壬辰八十六歲

輓聯

門下士汪鳴鑾

籌國軫前勞卽今北闕頒綸練達終能邀定論

著書娛晚景可奈西河投杖期頤未得盡餘年

門下士許振禕

中興國計賴司農讀所輯政書知自提綱分擘畫

晚歲賓筵如衛武方心儀箴訓豈期負杖已逍遙

世侍祁世長

壯遊曾說隨輶最難忘隴阪馳驅驛路采風徵筆記

老學勤能炳燭默參透義經消息曉窗研露當書思

門下士袁昶

畫鈔細字夜誦遺經三十篋留沈麟老傳書善學真如明燭炳  
早究椎鹽晚持般運千萬緡仗劉士安智計苦心誰識夢錢流

愚弟崇厚

碩德云亡記當年綜核度支主持國計

文星遽隕痛今日人琴俱邈誰振宗風

門下士吳大澂

文字有前緣杖履重親十日內猶談易理

毀譽無定論絲綸特賁九原下惟感君恩

門下士洪鈞

劬學繼儀徵生平鉛槧精勤八秩更窮周易義

享年逾德化先後絲綸褒卹九原並慰老臣心

門下士王鵬壽

勛業炳三台愧賤子不才輒從綠野堂開趨侍絳帷親化雨



孤嫠存兩代歎哲人竟萎况是金商律轉空吟素韞感秋風

姻愚姪王祿書

位歷四朝五十年退食著書不知老至

壽將九秩三百日痛心喪子賴有孫貽

惟全福克享遐齡服古服官經濟皆由學問

是賢母能成孤子教忠教孝科名備極顯揚

刻苦起家憶當年教子幼孤茹素可憐貞節母

顯榮退位看平日著書耄老傳經惟有弱齡孫

農部建殊勳五十年中外協和位祿壽名真出

吾鄉有明德廿七史見聞擇錄文章學業但詒孫

子壻齊長鴻

讀書破萬卷一生樂此不疲數十載愛惜分陰手錄已成盈尺集  
叩別憶當年往事依然如昨二千里驚傳噩耗心傷欲賦大招篇  
問到外孫名號事事關心從今信斷人閒檢點舊函腸欲裂  
郵呈每種詩文篇篇過目此後神馳天上追維高誼淚難乾

子壻王翰書

十餘年同侍鯉庭聞禮聞詩伯仲襟連慚附驥  
廿七史久耽蛾術忘憂忘食始終筆記細於蠅

外孫壻王泗孫

農部久司農當年籌國籌民練達今邀定論  
壻鄉重見壻此後讀經讀史規模但有遺書  
有福讀書是以在官在家八秩未荒鈔誦事  
逾情識我從後勵行勵學九原期慰愛憐心

自輓

不惠不夷渺滄海之一粟  
而今而後聽史論於千秋

不孝 謹按 先大父性愛讀書尤講求考據之學著有江

北運程四函楚漕江程四函甘棠小志四本鳳臺祇謁筆

記一本永甯祇謁筆記一本度隴記一函儷白妃黃楹聯

八冊仁在堂時藝發時藝開時藝向共四函荻芬書屋詩

文賦試帖新印文豪二本毡底零箋一本等書行世自壬

午年致仕家居復編年手訂年譜自一歲至八十六歲凡

二卷辛卯冬 先本生父逝世後 先大父遂願 不孝等

曰我近年心甚傷神氣衰憊恐不能久有書成自輓匾聯

將來懸我匪側其匾云還讀我書聯云不惠不夷渺滄海

之一粟而今而後聽史論齡千秋

不孝

等謹識之不敢忘

至是年譜遂不復記事竟成絕筆嗚呼痛哉

不孝

謹就已

刻之年譜詳校之未刻者補刊之不敢參一字敬將

論旨并

御賜祭文恭書冠於卷首以紀

聖恩而光泉壤

不孝誠

泣識